

# BASOKOLOGI

## KI TLA BA RUTA ENG?

Puku e ke e ngoe e byalo ka puku ela e bitšoago „Thuto ea Konfirmasi“. Gomme e tla thusa bomeester le bohle ba ba tsenchago phuthego ea basokologi. Batho banntši ba ba kgo-pelago go tsena phuthego ea kolobetšo, ke batho ba ba godilego, e se ba tsena sekolo sa bana. Ga ba soane le bana ba phuthego ea Konfirmasi. Bana ba phuthego ea Konfirmasi ba shetše ba rutiloe ditaba tša Bible le Katekisma sekolong. Ge ba thoma go tsena thuto ea Konfirmasi, ba shetše ba tloaetše thuto, 'mme ba rutega ga botse. Gomme Moruti o tla kgona go ba ruta tše nntši, ka-gobane hlaologanyo ea bona e phala ea motho e a sokologago, a shetse a godile. Ke gona ga go kgonege gore motho e a sokologi-lego é le e mogolo, a rutoe phuthegong e tee le ea bana ba sekolo ba ba rutoaga „Thuto ea Konfirmasi“. Ba soanetše go rutoa phuthegong e shele, gore ba tle ba rutoe tšohle go tloga mathomong a tšona, ka mo go lekanago hlaologanyo ea bona.

Ke gona go ngoadiloego puku e ea „Basokologi ki tla ba ruta eng?“ E laetša tsela e, thuto ea ba bagolo e ka sepedishoago ka eona. Sa pele go tla rutoa ditaba tša Testamente e tala, kamorago tša Testamente e mphsa; kamorago go rutoa Katekisma. Gomme ka gobane bonntši bya ba phuthego ke batho ba ba sesho ba tloaela tša lentšu la Modimo, Moruti o soanetše gore: ka letšatši le lengoe le le lengoe, ge a e ea go tsencha phuthego, a itokishe ga botsebotse koa gae, gore a kgone go laodishetša barutioa ba gagoe ditaba ka moka ka go di bolela ka hlogo. Ka mokgoa o byalo o tla kgona go bolela dihlogo tša ditaba, a tlogela tše a di hoetšago gobane di shita hlaologanyo ea bona. Mo ki shupa ka gogolo ditaba tša Bible. Gobane ba phuthego ea ba bagolo ga ba soane le bana ba thuto ea Konfirmasi. Ga ba kgone go ithuta ditaba tše ka moka koa gae. Ki realo ge ki bolela ditaba tša Bible. Ga e le tša Katekisma di ka se ke tša ba shita. Le ge ba sa tsebe go bala gabotse, ba tla no ithutathuta koa gae, ba thusoa ke bagabo koa gae, le ga e le moruti ka lebaka la phuthego.

Thuto e ngoe le e ngoe ea puku e ngoadiloe ka mo e ka sepedishoago ka gona. Ge go ka kgonega, a go thongoe ka kopelo, go tloaetša ba bafsa bao go opela. Fela le ge e ka ba kopelo ea

ba shita, ga e le thapelo e soanetše go ba gona ka mehla. Kamorago go boeletšoa thuto ea maloba. Kamorago go ishoa pele ka thuto e mphsa. Kamorago go ka beoa dipotšisho tše di ngoadiloego mo thutong e ngoe le e ngoe ea puku e. Dipotšisho tšeo di ngoadiloego ga di fetše taba; e fo ba go laetša dihlogo tša ditaba, le ka mo thuto e soanetšego go sepedishoa ka gona. Mosoara-phuthego o tla oketša a botšisha le tše dingoe, ka mo go lekanago hlaologanyo ea barutioa ba gagoe. Gape le diphetolo a se ke a gopola eke morutioa oa gagoe o soanetše go ithuta diphetolo tšeo go di bolela ka hlogo. Aoa, eupya a rutoe go fetola ka go gopola, le ka hlaologanyo. — Ge phuthego e fedile, go beoa thapelo; gomme ge go ka kgonega, a go fetšoe ka kopelo.

Ge phuthego e tsena gabedi le ga e le gararo ka beke, ba ka fetša dithuto tše di 49 tša puku e ka ngoaga o tee.

Yesu Mopholoshi oa rena a ke a shegofatše bohle ba ba rutago le bohle ba ba rutoago ka puku e.

Ki nna  
Moruti C. Hoffmann.



### Thuto ea 1.

Go thongoa ka go opela kopelo, le ka thapelo.  
Go rutoa

**Hlolo,  
Go bopya ga motho,  
Tša Paradeis,**

ka mo di ngoadiloego pukung ea „Ditaba tša Bible“, letlakala la 3—5, le ga e le Genesis kgaoganyo ea 1 le 2.

Go beoa dipotšisho, she di:

1. Legodimo le lefase le tšohle tše di lego gona di diriloe ke mang?

Di diriloe ke Modimo Yehofa.

2. O di dirile ka'ng?

A bolela lentšu fela, gomme tša ba gona.

3. Dilo ka moka a di dira ka matšatši a makae?

Ka matšatši a seelago.

4. Ga e le motho eena o bopiloe ka'ng?

Ka lerole la lefase.

5. Ge Yehofa a bopa motho, a mmopa ka sesoancho sa mang?

Ka sesoancho sa Modimo.

6. Ga e le mosadi oa motho, Yehofa o mmopile byang?

A ncha le lengoe la dikgopo tša monna, gomme a bopa mosadi ka lona.

7. Chemo ea Eden e, Yehofa a ba hlomelago eona, e be e le e byang?

E be e le e botse ea dihlare tša mehutahuta tše bose tše di kgahlishago mahlong, tše bose go leoa.

8. A ba fa molao o fe?

A ba fa molao oa gore: Le tla dya dihlare tša chemo ka moka; fela sehlare sa go tseba botse le bobee, le se ke la se dya; gobane mohla le dyago sona, le tla hua lehu.

Thuto e fetšoa ka go bea thapelo, le ka kopelo.

### Thuto ea 2.

Go thongoa ka go opela kopelo, le ka thapelo.

Go boeletšoa thuto ea 1.

Go ishoa pele ka tša thuto ea 2. Phuthego e rutoa „Ditaba tša Bible“, letlakala la 6 (Genesis 3):

## Go oa ga batho.

Kamorago go ka bea dipotšisho, she di:

1. E mobe eo a sentšego batho ke mang? gape e mobe eo o be a tla ka sebopego sa eng?

Ke Sathane; o be a tšere sebopego sa noga.

2. Maaka a gagoe a forilego mosadi ka ona, a reng?

A re: Mohla le e dya sehlare se, mahlo a lena a tla buduloga, gomme le tla ba byalo ka Modimo, le tseba botse le bobe.

3. Ge Adam le Efa ba lle sehlare seo, ba soana le Modimo na?

Aoa, ge mahlo a bona a budulogile, ba bona gobane ga ba tsoara, le gobane ba senyegile.

4. Modimo a ahlola noga, mme a reng go eona?

A re: Kagobane u dirile fao, u rogoe gare ga dikgomo le tše di phedilego ka moka tša lefase. Gomme ki tla bea lehloeo gare ga oena le mosadi, le gare ga peu ea gago le peu ea gagoe. Eona e tla gu pshatla hlogo, gomme oena u tla e loma serethe.

5. Modimo a reng, ge a ahlola mosadi?

A re: U tla belega bana ka bohloko, le ga go le byalo hlologelo ea gago e tla ba go monna oa gago, gomme eena o tla gu busha.

6. Go monna a reng?

A re: U tla dya bogobe bya gago ka mefufutšo ea sefahlogo sa gago, go be go tle u boele mobung o u nchitšoe go ona. Gobane u lerole, gomme u tla ba u boele leroleng.

7. Ge Modimo a holofetša a re: peu ea mosadi e tla tla e pshatla noga hlogo, o shupa go tla ga mang?

Go tla ga Morena Yesu, e a tla go pholoshwa batho le lefase ka moka matleng a Sathane.

Thuto e fetšoa ka go bea thapelo, le ka kopelo.

### Thuto ea 3.

Thuto e thongoa ka go opela kopelo, le ka thapelo.

Go boeletšoa thuto ea 2.

Kamorago go tla ishoa pele ka thuto ea 3. — Taba ea 1: Phuthego a e laodishetšoe ka boripana ka mo sebe sa Adam le Efa se aparetšego bana ba bona, goa ba Kain a tsogela Abel, ngoanabo, mme a mmolaea. Gomme a chabela nageng e ngoe. Ditlogoloana tša gagoe ea ba batho ba ba sa boifego Modimo. Efa a boela a belega moroa, 'mme a mo rea leina la Seth. Gomme Seth le ditlogoloana tša gagoe ba rapela Modimo Yehofa. — Taba ea 2: Phuthego a e laodishetšoe ka mo ditlogo-

loana tša Kain di thomilego go ata lefaseng, le bokgopo bya fela bya ata; goa ba bana ba Seth ba hlanoshoa le bona. Gomme go ishoa pele ka tša metsifula. A go rutoe ka mo Noa a boditšego batho lentšu la Modimo ka mengoaga ea 120. 'Mme ba gana. Gomme goa tla metsifula, a khurumetša lefase; 'mme batho ka moka ba hua. Goa shala Noa fela le bagabo, ba bolokiloe arekeng. — Ditaba tšeo di ka boleloa ka boripana fela. Taba e kgolo ea thuto ea 3 a e be ea

## Mmoto oa Babel.

Phuthego a e ke e laodishetšoe taba eo ka mo e ngoadiloego pukung ea „Ditaba tša Bibe“, letl. la 12, le ga e le Genesis 11, 1—9.

Kamorago go ka botšishoa gore:

1. Lefase ka moka le be le na le maleme a makae, le dipolelo tše kae?

Leleme le te, le polelo e te.

2. Ge batho ba boletše ba re: a re ageng mmoto o, nthla ea ona e fihlago legodimong, re tle re itirele leina! ke go arogana le mang?

Ke go arogana le Mong oa bona, Yehofa. Gomme ka karogano e go thomile seheitene mo lefaseng.

3. Modimo ge a bona gore ba mo lahlile ruri, a dira'ng?

A raranya polelo ea bona, gore eo mongoe a se ke a koa polelo ea eo mongoe. Ke mo go thomilego dipolelo tša mehuta tša batho. Ke kotlo ea Yehofa, gobane batho ba mo lahlile.

4. Kotlo e ngoe ea Yehofa ke e fe?

A gashanya batho lefaseng ka moka. Thuto e fetšoa ka go bea thapelo, le ka kopelo.

### Thuto ea 4.

Thuto e thongoa ka go opela kopelo, le ka thapelo.

Go boeletšoa thuto ea 3.

Go ishoa pele ka thuto ea 4.

Taba ea 1 she: Batho ka moka ba be ba hlanogetše Yehofa. Byalo Yehofa a ikgethela Abraham, a mo ncha gagabo, a mo isha Kanaan, gore a tsoale sechaba sa batho ba ba rapelago Modimo Yehofa. O ratile gore ka sechaba seo sa go rapela Modimo go shegofatšoe dichaba tša lefase ka moka.

Taba ea 2 she: Phuthego a e laodishetšoe ditaba tša

## Abraham,

ka mo di ngoadiloego pukung ea „Ditaba tša Bibe“, letl. la 13

(Genesis 11, 27—12, 6), gape letlak. la 15—17 (Genesis 15—18), gape letlak. la 20 (Genesis 22).

Taba ea 3 she: A go rutoe gore: Isaak, moroa oa Abraham, a tšea mosadi, Rebeka. Ba tsoala baroa ba babedi; e mongoe ke Esau, e mongoe ke Yakob. Esau o be a hlanogela Modimo. Yakob a direla Yehofa. Ke gona Yehofa a mo kgethilego, gore a be eo sechaba sa Modimo se tlogo tsoaloa ka eena. Gomme Yakob eo a bitšoa go Israel a ba le baroa ba 12. Eo mongoe oa bona ke Yuda. 'Mme Yehofa a kgetha Yuda gare ga bongooanabo, 'mme a mo holofetša gore: Mopholoshi e a tlogo lefaseng o tla tsoaloa e le oa leshika la Yuda. Eo mongoe ke Yosef. Gomme bongooanabo ba mo hloile, 'mme ba mo rekisha. 'Mme a tlišoa nageng ea Egipte e le mohlanka. Gomme ka gobane a sepela ka ditaelo tša Modimo, ke gona Yehofa a busha kgolego ea gagoe. Gomme Yosef ea ba Morena e mogolo nageng ea Farao kgoshi ea Egipte. Gomme tlala ea oela lefase ka moka. Gomme bongooanabo Yosef ba tla Egipte go reka didyo. Gomme Yosef a ba direla ka kgaogelo, 'mme a ba fa. Gomme ba chaba tlala koa Kanaan, ba tla go dula Egipte.

Taba ea 4 she, phuthego e botšišoa gore:

1. Yehofa ge a bitša Abraham, a mo isha nageng ea Kanaan, ke ka baka lang?

Ke gobane o ratile go mo ncha felong ga baheitene, a tle a dule nageng e shele, gore a tsoale sechaba sa Modimo gona.

2. A dichaba tše dingoe Modimo o be a di lahlile?

Aoa, eupy a o ratile go di sokollela go Eena ka thuso ea sechaba sa Modimo.

3. Yehofa a leka tumelo ea Abraham ka ge a laela Abraham gore a ke a reng ka Isaak moroa oa gagoe eo a tsoetšoe go a le nnoshi?

Ka ge a mo laela gore a tšee Isaak, a mo hlabele Yehofa thabeng ea Moriya.

4. Mo gare ga baroa ba Isaak eo a lego modumedi ke mang?

Ke Yakob, leina le lengoe la gagoe ke Israel.

5. Mo gare ga baroa ba 12 ba Israel eo Yehofa a mo kgethilego, gore e be eena eo Yesu Kriste Mopholoshi a tlogo tsoaloa molokong oa gagoe, ke mang?

Ke Yuda.

6. Ge bana ba Israel ba tlile Egipte, go diregile byang?

Yosef o be a ba biletša Egipte, gore ba chabele tlala gona.

Thuto e fetšoa ka go bea thapelo, le ka kopelo.

## Thuto ea 5.

Thuto e thongoa ka go opela kopelo, le ka thapelo.

Go boeletšoa thuto ea 4.

Go ishoa pele ka thuto ea 5. — Taba ea 1: Go rutoa tša

## Moshe.

Di ngoadiloe pukung ea „Ditaba tša Bibeletš“, letlakala la 50—63 (Eksodus).

Mosoara-phuthego a ke a thome ka Matsoala a Moshe, 'mme a ishe pele ka Go bitšoa ga Moshe, le ka Go tšoa ga ba Israel, Go beoa ga melao thabeng ea Sinai, Naman e ea gauta. A ke a itokishe pele ka go bala ditaba tšeo koa gae, a tle a kgone go di bolela ka hlogo, le ka go di kopanya.

Taba ea 2: Go rutoa gore: Bana ba Israel ba be ba phela leshokeng ka mengoaga e 40. Gomme Yehofa a holofetša Moshe gore: Ki sa tlo tsoshetša ba Israel moprofeti e mongoe byalo ka oena Moshe. Gomme ka gona a shupa Yesu, Moroa oa Modimo. — Gomme Moshe a hua. Gomme Yosua a tsena legatong la gagoe, mme a isha ba Israel nageng ea Kanaan.

Taba ea 3: Go botšišoa gore:

1. Ge Moshe a belegiloe, gomme bagabo ba mo fihla letlakanokeng mo lebotong la noka, ke ka baka lang?

Ke gobane Farao o be a beetše ba Israel molao o mothata oa gore: ge go belega moshimanyana, o soanetše go bolaoa.

2. Ge Modimo a bitša Moshe, a iponagatša go eena a le kae?

A le kgabong ea mollo e tšoa go sekgoeng sa dihlare; sekgoa sa tuka mollo, gomme le ga go le byalo se sa fse.

3. Modimo a romela Moshe go Farao go dirang gona?

Go botša Farao gore a hunolle sechaba sa Israel, gore se tloge se boele Kanaan.

4. Ge Farao a gana, Yehofa a mo gapeletša ka'ng?

A mo gapeletša ka go mo tiea ka dikotlo.

5. Kotlo e kgolo e be e le e fe?

Ke ge a bolaea maetšibulo a ba Egipte a batho le a dikgomo.

6. Ge Morongoa oa Yehofa a sepela boshego go bolaea maetšibulo, bana ba Israel ba bolokoa ka'ng?

Ka madi a koanyana, a ba tloditšego ona medyakong ea nyoako ea bona.

7. Mohlolo oa Yehofa, o a o dirilego leoatleng le lehubidu, ke o fe?

Yehofa a omisha leoatle, goa ba ba Israel ba sepela gare ga leoatle mo tseleng e omilego. Eupya Farao le bahlanka ba gaḡoe ba tšea ke leoatle.

8. Mo thabeng ea Sinai ba Israel ba filoe eng?

Melao e lesome.

9. Sebe sa bona se segolo ke ge ba itirela modimo o shele o fe?

Namane ea gauta.

10. Kholofedisho ea Yehofa, e a e filego Moshe, ke e fe?

A mo holofetša gore o tla tsoshetša ba Israel moprofeti byalo ka eena. Ke go shupa Yesu Mopholoshi.

11. Eo a fihlishitšego ba Israel koa Kanaan ke mang?

Ke Yosua.

Thuto e fetšoa ka go bea thapelo, le ka kopelo.

#### Thuto ea 6.

Thuto e thongoa ka go opela kopelo, le ka thapelo.

Go boeletšoa thuto ea 5.

Go ishoa pele ka thuto ea 6.

Taba ea 1: Go tla rutoa gore: Sechaba sa ba Israel se be se bushoa ke Saul kgoshi. Gomme monna eo a senya go Yehofa, 'mme a lahloa. Gomme Yehofa a ikgethela Dafid, moroa oa Isai, oa moloko oa Yuda. Gagabo Dafid ke Bethlehem.

Taba ea 2: Go rutoa tša

#### Dafid.

Go thongoa ka Dafid le Goliath, di ngoadiloe pukung ea „Ditaba tša Bibebe“, letlak. la 88 (1. Samuel 17); go ishoa pele ka Dafid o ratoa ke Yonathan, gomme o hloioa ke Saul, letlak. la 91 (1. Samuel 18—20); Dafid o godisha motlotšoa oa Yehofa; lehu la Saul, letlak. la 93 (1. Sam. 24, le 2. Sam. 1); Dafid o godishoa; go oa le go sokologa ga gaḡoe, letlak. la 97 (2. Sam. 2—12).

Mosoara-phuthego a ke a itokishetše thuto e ka go bala ditaba ka moka pele koa gae, a tle a kgone go ncha tše, a ka rutago phuthego tšona. Gomme mohla a ruta, o soanetše go di bolela ka hlogo.

Taba ea 3: Dipotšisho she di:

1. Gagabo Dafid ke kae, gape ke oa moloko o fe?

Gagabo Dafid ke Bethlehem, gape ke motho oa moloko oa Yuda.

2. Se se kgonishitšego Dafid go fenyha Goliath ke eng?

Ke tumelo ea gaḡoe, gobane o be a re: Yehofa e a mpholoshitšego taung le bereng, o tla mpholoshla le go mofilisti e.

3. Saul o hloile Dafid ka baka lang?

O be a na le mona, gobane basadi ge ba bina kosha, ba tumisha Dafid go fetisha Saul, ba re: Saul o bolaile ba sekete, gomme Dafid o bolaile ba dikete tše lesome. Ba realo, mohla Dafid a bolaile Goliath.

4. Yonathan, moroa oa Saul, o be a rata Dafid, gomme a mo thusha ka go dira'ng?

Ka go bolela Dafid ga botse go tatagoe, gore a se ke a bolaea Dafid.

5. Dafid a godisha motlotšoa oa Yehofa, ka ge a dira'ng?

Ka ge a gana go bolaea Saul, mohla a tlile pokanong ea gaḡoe boshego, mola a mo hoetša a robetše le banna ba gaḡoe.

6. Leina la motse oa Dafid ke le fe, gape o be o agiloe thabeng e fe?

Ke Yerusalem; 'mme o be o agiloe thabeng ea Sion.

7. Dafid o oetše sebeng se fe?

O setše molao oa 6 le Batseba, mosadi oa Uria, gomme a oketša a senya ka go bolaea Uria.

8. Nathan moprofeti a mo sola, 'mme Dafid a kgopela tebalelo. Nathan o be a mo eletša ka sesoancho se fe?

Ka sesoancho sa nku ea mohumanegi.

9. Mohla Dafid a rata go agela Yehofa ngoako, a fioa kholofedisho e fe?

Kholofedisho ea gore: Ki tla tsosha peu ea gago ka morago ga gago e tlogo tšoa mmeleng oa gago, gomme ki tla tiishetša bogoshi bya gaḡoe.

10. Ka peu e ea Dafid Yehofa a shupa mang?

A shupa Yesu, Moroa oa Modimo, gore o tla tla a tsoaloe Bethlehem, e le motho oa ngoako oa Dafid oa moloko oa Yuda.

Thuto e fetšoa ka go bea thapelo, le ka kopelo.

#### Thuto ea 7.

Thuto e thongoa ka go opela kopelo, le ka thapelo.

Go boeletšoa thuto ea 6.

Go ishoa pele ka thuto ea 7, she:

#### Eliya moprofeti.

Di ngoadiloe pukung ea „Ditaba“, letlakala la 108—114 (1. Dikgoshi 15—19; 2. Dikgoshi 2).

Dipotšisho she di:

1. Sechaba sa Israel sa arogana, ea ba mebusho e mekae?  
E mebedi, oa Yuda le oa Israel.

2. Ahab kgoshi ea Israel, ge a hlanogetše Yehofa mme a direla Baal modimo o shele, go diregile byang?

Ahab o be a nyetše mosadi oa moheitene, Isebel: ke eena eo a mo hlanoshitšego.

3. Kotlo ea Yehofa e, a e boletšego ka molomo oa Eliya moprofeti, ke e fe?

Yehofa 'a thibela pula ka mengoaga e meraro le dikgoedi tše di seelago.

4. Yehofa a phedisha moprofeti Eliya ka go dira mehlolo e fe?

Mohlolo oa pele ke ge a mo romela magukubu, a mo tlishetša senkgoa le nama ka mosoana le ka maabane. Mohlolo oa bobedi Yehofa a o dira, ge Eliya a le Sarpath; a dira gore bopi byo ba nago le byona pitšeng bo se ke bya fela, gomme makhura a lego legapeng a se ke a hlokafala.

5. Modiro o matete o, Eliya a dirilego ona go moroa oa mosadi oa mohlologadi oa Sarpath, ke o fe?

Eliya a tsosha ngoana eo lehung ka matla a Yehofa.

6. Yehofa a tlogela pefelo ea gagoe 'mme a boela a nesho pula, mohla ba Israel ba dirago eng?

Mohla ba lahlile Baal modimo o shele 'mme ba oa ka difahlogo ba re: Yehofa ke Modimo, Yehofa ke Modimo!

7. Go diregile byang, ge ba sokologetše go Yehofa?

Go diregile thabeng ea Karmel; ge baprofeti ba Baal ba bitša modimo oa bona, ga a ka a ba fa phetolo. Eupya ge Eliya a bitša Yehofa ka thapelo ea gagoe, Morena a fetola, 'mme mollo oa gagoe oa oa, oa dya sehlabelo sa Eliya.

8. Eliya moprofeti o feleditše kae?

Yehofa a mo rotoshetša legodimong ka koloi ea mollo e nago le dipere tša mollo.

Thuto e fetšoa ka go bea thapelo, le ka kopelo.

### Thuto ea 8.

Thuto e thongoa ka go opela kopelo, le ka thapelo.

Go boeletšoa thuto ea 7.

Go ishoa pele ka thuto ea 8.

Taba ea 1: A go rutoe ditaba she di: Yehofa o be a tsosha baprofeti go biletša ba Israel thsokologong. Baprofeti ba matla mo gare ga bona ke Hosea, le Yoel, le Amos, le Obadya. Gomme ba Israel ba gana thsokologo, 'mme ba direla medimo e shele. Ke gona Yehofa a galefela ba Israel, 'mme a ba tlogela. Gomme goa tla Salmanasser, kgoshi ea Assiria, ka dira,

a ba fenyaa, 'mme a tlosha ba Israel nageng ea bona, a ba isha bothopyeng koa Assiria. Gomme goa shala ba moloko oa Yuda fela. Baprofeti ba bona ea ba Yesaya le Mika. Baprofeti bao ba ruta kakudu tša Mopholoshi e a tlogo. Yesaya a ba tsebisha gobane e tla ba motho oa moloko oa Isai (Yesaya 11). Tša dihlokofalo tša Mesia (ke gore Motlotšoa oa Modimo) a di bolela le tšona (Yesaya 53). Ga e le Mika eena a ba tsebisha gobane Mopholoshi eo a tlogo o tla tsoaloo Bethlehem motseng oa Yuda (Mika 5). Eupya le ge ba ruta lentšu la Modimo ga botse, bayuda ga ba ka ba theetša, gomme ka mafelelo ba tlogela Yehofa. Ke mo Yehofa a ba eletšago ka Yeremia moprofeti. Gomme ba upya ba gana go sokologa. Ke gona Yehofa a ba otlogo ka kotlo e kgolo she: Goa tla Nebukadnetsar, kgoshi ea Babel, ka dira tše dikgolo, a fenyaa bayuda, 'mme a ba isha bothopyeng koa Babel. Moprofeti eo, Yehofa a ba rutilego ka eena koa Babel, ke Daniël. Gomme ba dutše gona ba le mathopya ka mengoaga e 70. Gomme Kores, kgoshi ea Baperse, a tšea mmusho oa Babel. Gomme Yehofa a busha pelo ea Kores, goa ba a hunolla bayuda bohlangeng, 'mme a ba fa tsela go boela Kanaan. Gomme ba tloga ba sepela. 'Mme ge ba tlile Kanaan, ba boela ba aga motse oa Yerusaleem, le Tempele ea Yehofa.

Taba ea 2: A go rutoe tša

### Haggai, le Sakarya, le Maleagi, baprofeti ba Yehofa.

Di ngoadiloe pukung ea „Ditaba tša Bibelee“, letlakala la 130, temana ea 5.

Taba ea 3: A go botšishoe gore:

1. Ba Israel ge ba gana go sokologa, Yehofa a ba otla ka go dira'ng?

Ka go ba isha bothopyeng koa Assiria.

2. Bayuda ge ba gana go sokologa, Yehofa a ba otla ka go dira'ng?

Ka go ba isha bothopyeng koa Babel.

3. Ba Israel ga ba ka ba boea bothopyeng bya koa Assiria. Bayuda ba boea bothopyeng bya koa Babel ka morago ga mengoaga e mekae?

Ka morago ga mengoaga e 70.

4. Baprofeti ba go ruta bayuda, mohla ba boetše Kanaan, ke bomang?

Ke Haggai, le Sakarya, le Maleagi.

5. Haggai a profeta Mopholoshi e a tlogo ka seema se fe? Yehofa o re: ki tla shishinya dichaba ka moka, gomme ke mo go tlogo tla thlologelo ea dichaba ka moka.

6. Sakarya a profeta tša Mesia eo ka seema se fe?

Hlalala kakudu, moroedi oa Sion; hlabelela, moroedi oa Yerusalem; bona kgoshi ea gago e e tla go oena, e le e a lokilego, le molopolodi, eo bonolo, a nametše esele le namane ea esele.

7. Maleagi a profeta go reng?

Morena o re: bona, ki tla roma morongoa oa ka, gomme o tla lokisha tsela mo pele ga ka. Gomme ka go akgofa go tla tla Tempeleng ea gagoe Morena eo le mo tsomago, le Morongoa oa kgoerano eo le mo hlogetšoeogo. Bona, o e tla! go realo Yehofa Tsebath.

Thuto e fetšoa ka go bea thapelo, le ka kopelo.

### Thuto ea 9.

Thuto e thongoa ka go opela kopelo, le ka thapelo.

Go boeletšoa thuto ea 8.

Go ishoa pele ka thuto ea 9.

Thuto ea 9 a e be poeletšo fela. Moruti oa phuthego a a ke a kopanye dithuto ka moka go tloga go ea 1 go isha go ea 8. A a boeletše dithuto tšeo ka go botšisha barutioa ba gagoe tše ba rutiloego tšona. Ka gogolo go diroe gore ba lemoge ditsela tša Modimo tše, a sepedishitšego batho ba gagoe mo go tšona go tloga mathomong, 'mme ba rutoe gore: ditsela tšeo ka moka di felela go Yesu Mopholoshi oa lefase ka moka. Gobane Yesu ke Eena Mesia eo, Yehofa a thomilego go mmolela, mohla Adam le Efa ba timeletšoe ke Paradeis ka baka la sebe. Yesu ke Eena Mopholoshi eo, Yehofa a mmoletšego go Moshe le go Dafid. Le ka molomo oa baprofeti ba mabaka a morago a fela a mmolela. A dira byalo gore mohlang a tlogo, batho ba mo tsebe gobane ke Eena Mopholoshi eo, a romiloego ke Tata oa magodimong go pholoha lefase ka moka dibeng le lehung le matleng a Sathane, 'mme ba mo amogele ga botse.

Dipotšišo tše, go kago boeletšoa dithuto ka tšona, she di:

1. Modimo o bopile batho gore ba phele ga botse Paradeising ea gagoe. Byalo ge ba lelekoa gona, ke ka molato o fe?

Ke kagobane ba foriloe ke noga, mme ba sela molao oa Yehofa.

2. Mohla ba lelekoa, ba fioa kholofedisho e fe?

Yehofa a ba holofetša gore: go tla tla Mopholoshi e a tlogo pshatla hlogo ea noga Sathane.

3. Seheitene — ke gore karogano le Yehofa — se thomile kae?

Seheitene se thomile koa mmotong oa Babel, mohla batho ba re: A re ageng mmoto o, nthla ea ona e fihlago legodimong. Ke mo ba thomilego go arogana le Modimo.

4. Yehofa gore a pholoshe dichaba timelong, a dira eng?

A ikgethela Abraham, a mo ncha makgatheng a bağabo, a mo isha nageng ea Kanaan, gore a tsoale sechaba se sengoe gona se se tlogo direla Yehofa. 'Mme o ratile gore: ka sechaba seo go shegofatšoe dichaba ka moka.

5. Borrabomogolo ba sechaba se sefsa seo sa Modimo ke bomang?

Ke Abraham, le Isaak, le Yakob leina le lengoe la gagoe e lego Israel.

6. Yehofa o be a holofetša gore o tla ba neela naga e fe? Kanaan.

7. Mo ba thomilego go ata gona, 'mme ea ba sechaba, ke kae?

Ke nageng ea Egipte.

8. Yehofa o kgethile mang gare ga baroa ba Israel, gore e be eena eo, Yesu Kriste Mesia a tlogo tsoaloa molokong oa gagoe? O kgethile Yuda.

9. Gomme monna eo, a nchitšego ba Israel Egipte go ba bushetša koa Kanaan, ke mang?

Ke Moshe.

10. Thabeng ea Sinai ba filoe eng?

Melao e lesome.

11. Kholofedisho e, Yehofa a e filego Moshe bakeng sa Mopholoshi e a tlogo, e reng?

E re: Ki tla tsoshetša ba Israel Moprofeta byaloka oena.

12. Monna eo, Yehofa a mo kgethetšego go ba kgoshi ea ba Israel, ke mang?

Ke Dafid, moroa oa Isai, oa moloko oa Yuda.

13. Dafid o filoe kholofelo e fe bakeng sa Mopholoshi e a tlogo?

Yehofa a re: Ki tla tsosha peu ea gago kamorago ga gago, e tlogo tšoa mmeleng oa gago, gomme ki tla tiishetša bogoshi bya gagoe.

14. Eliya moprofeti o soancha Yesu Mopholoshi ka ge a tloga byang lefaseng?

Ka ge a tloga e sego ka lehu, e lego ka go rotoshetšoa legodimong.

15. Kagobane ba Israel ba be ba tlogetše Yehofa, Morena a ba lesa ba oela diatleng tša manaba a fe?

Ba meloko e lesome ba thopya ke Salmanassar, ba ishoa Assiria. Ba moloko oa Yuda ba thopya ke Nebukadnetsar, 'mme ba ishoa Babel.

16. Go boile ba fe?

Go boile ba moloko oa Yuda; ba meloko e 10 ga ba ka ba boea.

17. Baprofeti ba bangoe ba ba rutilego ba moloko oa Yuda, 'mme ba ba eletša tša Mesia e a tlogo, ke ba fe?

Ke Yesaya, le Mika.

18. Yesaya a ba tsebisha gore: Mesia o tla ba motho oa leshika la mang?

E tla ba oa leshika la Isai.

19. Mika a ba tsebisha gore: o tla tsoaloe motseng o fe? Bethlehem oa Yuda.

20. Baprofeti ba bangoe ba, Yehofa a boletšego ka molomo oa bona go tsebisha ba Yuda gobane Mopholoshi o e tla, ke bomang?

Ke Haggai, le Sakarya, le Maleagi.

21. Maleagi o bolela gore: go tla tla mang go lokishetša Mesia tsela?

A re: go tla tla Morongoa oa Modimo.

Thuto e fetšoa ka go bea thapelo, le ka kopelo.

#### Thuto ea 10.

Thuto e thongoa ka go opela kopelo, le ka thapelo.

Go boeletšoa thuto ea 9.

Go ishoa pele ka thuto ea 10. Go rutoa ditaba tša

#### Yohannes Mokolobetši.

Di ngoadiloe pukung ea „Ditaba tša Bible“, letlakala la 131: Tsebisho ea Matsoalo a Yohannes; gape letlakala la 134: Matsoalo a Yohannes (Lukas 1, 5—23; 57—67); gape letlakala la 141: Yohannes Mokolobetši (Math. 3); letlakala la 160: Lehula Yohannes (Mark. 6, 17—29).

Moruti oa phutho a ke a itokishe pele ka go bala ditaba tšeo ka moka koa gae, a tle a kgone go laodishetša phutho tšona ka go di bolela ka hlogo.

Dipotšisho she di:

1. Motho eo, Modimo a mo romilego gore a ete Mesia pele ka moea le ka matla a Eliya, ke mang?

Ke Yohannes Mokolobetši.

2. Batsoadi ba gagoe ke bomang?

Ke Sakarias le Elisabeth.

3. Matsoalo a ngoana oa bona ba a tsebishitšoe ke mang?

Ke Gabriel morongoa oa Modimo; o be a tla go Sakarias, ge a le Tempeleng.

4. Ge Sakarias a dikadika a re: Tšeo nka di tseba kang? morongoa a mo fa poncho e fe?

E ea gore: U tla shitoa go bolela go be go fihle moñla o, ditaba tšeo di diregago ka ona.

5. Ge Yohannes a godile, a lokishetša Morena Yesu tsela ka go dirang?

A ruta gore: Sokologang, mmusho oa Modimo o batametše.

6. A batho ba ea go mo koa na?

E, ba Yuda ba banntši ba ea go eena go mmotšisha gore: oena u mang? gomme a fetola a re: ga ki Kriste, ga ki Eliya, nna ki „lentšu la e a bitšago leshokeng gore: otlolang tsela ea Morena!“

7. A kolobetša kae? gape a bolela a reng go ba kolobetšoa ba gagoe?

A kolobetša koa nokeng ea Yordan, gomme a bolela a re: Ki a kolobetša ka metsi; eupya mo gare ga lena go eme eo le sa mo tsebego. Ke eena e a tlogo kamorago ga ka, eo a bilego pele ga ka, eo ki sa lokelego go hunolla leralala la dieta tša gagoe.

8. Morena Yesu ge ba mmotšisha tša Yohannes, a reng?

A re: Yohannes ke eo go ngoadiloe go tša gagoe gore: Bona, ki tla roma morongoa oa ka pele ga gago, e a tlogo lokisha tsela ea gago pele gagago.

9. Yohannes o huile kae?

O huile kgolegong. O be a kgala bootsoa bya Herodes kgoshi. Ke gona Herodes a mo lahletšego kgolegong. Gomme ba mmolaile gona.

Thuto e fetšoa ka go bea thapelo, le ka kopelo.

#### Thuto ea 11.

Thuto e thongoa ka go opela kopelo, le ka thapelo.

Go boeletšoa thuto ea 10.

Go ishoa pele ka thuto ea 11, she:

#### Matsoalo a Yesu Kriste.

A go thongoe ka Tsebisho ea Matsoalo a Kriste. Di ngoadiloe pukung ea „Ditaba“, letl. la 132—133 (Luk. 1, 26—38). Tša Matsoalo a Morena di ngoadiloe pukung ea „Ditaba tša Bible“, letlakala la 136 (Luk. 2, 1—20).

Dipotšisho she di:

1. Morena Yesu ke mang ka go reresha?

Ke Modimo ka go reresha, gobane ke Moroa oa Modimo.



2. Ke mang a boletšego a rego ke Moroa oa Modimo?

Ke Gabriel morongoa oa Yehofa; gobane mohla a tlike go tsebisha Maria matsoalo a Yesu, a mmolela ka mafoko a rego: Oena Maria, u tla belega moroa, gomme u tla mo rea leina la Yesu; e tla ba e mogolo, gomme o tla bitšoa Moroa oa Eo-godimo-dimo.

3. Gape ke mang ka go reresha?

Ke motho ka go reresha, gobane o belegiloe ke Maria kgarebe.

4. Maria mmago Yesu e be e le motho oa leshika la mang? Oa leshika la Dafid oa moloko oa Yuda.

5. Yesu o belegiloe kae?

Bethlehem, motseng oa Dafid, ka mo Mika moprofeti a bego a bolela pele.

6. Modimo Tata a dirang, gore matsoalo a moroa oa gagoe a tsebye koa Bethlehem?

A romela morongoa oa gagoe go tsebisha badishi gore: Se boifeng, gobane ki le botša taba e botse ea thabo e kgolo e tlogo ba ea sechaba ka moka; gobane mopholoshi le mo tsoaletšoe lehono, e lego Kriste Morena, mo motseng oa Dafid.

7. Kopelo ea barongoa, e ba e opetšego boshego byo bokgethoa bya matsoalo a ngoana Yesu, e reng?

E re: Tumisho e ee magodimong a godimo go Modimo, le lefaseng go be le khutšo, kgahliso bathong.

Thuto e fetšoa ka thapelo, le ka kopelo.

#### Thuto ea 12.

Thuto e thongoa ka go opela kopelo, le ka thapelo.

Go boeletšoa thuto ea 11.

Go ishoa pele ka thuto ea 12, she:

#### Ba bohlale ba bohlabela.

Di ngoadiloe „Ditaba tša Bibe“, letl. la 139—140 (Math. 2).

Dipotšisho she di:

1. Baheitene ba ba tlikego go rapela Yesu e le ba mathomo, ke bafe?

Ke ba bohlale ba bohlabela.

2. Ke ka baka lang ge ba tsoma ngoana Yesu koa Yerusalem?

Gobane Yerusalem e be e le moshate oa ba Yuda.

3. Ge Herodes a ba romela Bethlehem, ke ka baka lang?

Ke gobane ba mangoalo ba be ba mo tsebisha se se ngoadiloego ke Mika moprofeti e a rego: Kgoshi e a tlogo disha sechaba sa Modimo o tla tšoa Bethlehem.

4. Ge ba bohlale ba sepela go ea Bethlehem, naleli ea dirang?

Ea ba eta pele, goa ba ea fihla e ema godimo ga felo fao, ngoana a lego gona.

5. Ke ka baka lang ge Yosef a chabisha ngoana le mmagoe, a ba isha Egipete?

O be a koile morongoa boshego dilorong, gore go tla tla Herodes, a tsoma ngoana go mmolaea.

6. Na Herodes o be a rata go dira byalo na?

E, kagobane o ile a romela dira go bolaea bashe-manyana ka moka ba Bethlehem.

7. Yosef a dula Egipete go fihla neng?

Go fihla ge a koile gobane Herodes o huile. Gona a boela gae, 'mme a tla a dula Natsareth.

Thuto e fetšoa ka thapelo, le ka kopelo.

#### Thuto ea 13.

Thuto e thongoa ka go opela kopelo, le ka thapelo.

Go boeletšoa thuto ea 12.

Go ishoa pele ka thuto ea 13, she:

#### Yesu ngoana monyanyeng oa Paseka.

Di ngoadiloe „Ditaba“, letlakala la 140 (Luk. 2, 41—52).

Dipotšisho she di:

1. Bodumedi bya batsoadi ba Yesu bo bonoa ka eng?

Ka ge ba ea Jerusalem ka mengoaga go direla Modimo Tempeleng.

2. Batsoadi ba badumedi ba rutoa eng ka taba ea Yosef le Maria?

Ba rutoa gore ge motho a na le ngoana, o soanetše go mo tloaetša go ea ngoakong oa Modimo ka mehla.

3. Ka mafoko a gagoe a gore „ki soanetše go ba mo go tše tša Tate!“ ngoana Yesu o re ruta eng?

O re ruta gore: bana ba Modimo ba soanetše go dula Tempeleng ea tatabo oa magodimong.

4. Ga e le bana ba rutoa eng ka ngoana Yesu?

Ba rutoa go godisha batsoadi ba bona.

Thuto e fetšoa ka thapelo, le ka kopelo.

#### Thuto ea 14.

Thuto e thongoa ka go opela kopelo, le ka thapelo.

Go boeletšoa thuto ea 13.

Go ishoa pele ka thuto ea 14, she:

## Polelo ea Kriste ge a le thabeng: lehlogonolo la bakreste.

Di ngoadiloe Math. 5, 1—6.

Dipotšišo she di:

1. Morena Yesu o tumisha ba fe ka gore: ba tla ba le lehlogonolo?

Ba ba humanegilego moeeng,  
ba ba nyamilego,  
ba boleta,  
ba ba nago le tlala ea go loka,  
bagaogedi,  
ba pelo e sekilego,  
badira-khutšo.

2. A re batho bao ba tla ba le lehlogonolo, le ge ba babe ba ka ba reng?

Le ge ba ka ba tlaishetša go loka, le ga e le ba ba tlaisha ka baka la Yesu Kriste; ba tla ba le lehlogonolo, le ga go le byalo.

3. Morena Yesu o soanacha batho ba Modimo ka eng?

A re: le letsoai la lefase,  
le seetša sa lefase,  
le motse o dutšego ka thabeng,  
le lebone le le hlomilego sehlo mong sa lona.

Thuto e fetšoa ka go bea thapelo, le ka kopelo.

### Thuto ea 15.

Thuto e thongoa ka go opela kopelo, le ka thapelo.

Go boeletšoa thuto ea 14.

Go ishoa pele ka thuto ea 15, she:

### Sesoancho sa Mobyadi.

Se ngoadiloe Math. 13, 1—23, le ga e le pukung ea „Ditaba tša Bibe“, letlakala la 158, 1.

Dipotšišo she di:

1. Yesu o soanacha dipelo tša batho gore di soana le eng le ga e le eng?

A re: mo gongoe di soana le tsela, le ga e le lekgoara, le ga e le metlua; mo gongoe di soana le mobu o botse.

2. Sesoancho seo se re laela eng?

Se re laela gore: re leme chemo ea pelo ea rena, go tlosa tše di thibelago lentšu la Modimo.

3. Mogoma o, re soanetšego go lema ka ona, ke eng?

Ke boithsolo, ge re ithsola ka matšatši.

4. Ke go dira byang?

Ke gore: ka letšatši le lengoe le le lengoe mohla re ea malaong, re soanetše go gopola tše, re sentšego ka tšona go Modimo le batho, le go ithsola bakeng sa dibe le diphosho tša rena tša mosegare. Ge modumedi a dira byalo, pelo ea gagoe e tla hloa ea ba e boleta, e ratago go dumela Yesu eo a huilego phateng ea sefapano go phollosa badiradibe. Go dira byalo ke go rema bothata bya pelo, ke go epolla mafsika, le go tomola metlua e thibelago lentšu la Modimo mo pelong. Ge re dira byalo, pelo e tla fetloa ea ba e soanago le mobu o botse.

5. Mo gare ga batho ba, u rutiloego ditaba tša bona, ba e lego ba ba soanago le tsela, le ga e le lekgoara, le ga e le metlua, ke ba fe?

Ke Adam le Efa, le Kain, le batho ba mehla ea Noa; gape ke ba mmoto oa Babel, le Farao, le Ahab; gape ke ba meloko e lesome, le ba moloko oa Yuda.

6. Ba ba soanago le mobu o botse, ke ba fe?

Ke Seth, le Noa le bagabo, le Abraham, le Moshe; gape ke Dafid, gobane le ge a sentše, a boela a ithsola 'mme a kgopela thsoarelo; gape ke Eliya le bapofeti ba bangoe.

Thuto e fetšoa ka go bea thapelo, le ka kopelo.

### Thuto ea 16.

Thuto e thongoa ka go opela kopelo, le ka thapelo.

Go boeletšoa thuto ea 15.

Go ishoa pele ka thuto ea 16, she:

### Moroa ea timetšego.

E ngoadiloe „Ditaba“, letl. la 177, 3 (Luk. 15, 11—32).

Dipotšišo she di:

1. Sesoancho seo se re ruta eng?

Se re ruta gore: eo a ithsolago 'mme a chabela go tatagoe oa legodimong ka go holofela kgaogelo ea gagoe, eena o tla bolokega.

2. Tsela e, moroa e monyane a senyegilego mo go eona, e na le dikgato tše nne, ke di fe?

Ea 1: ke boikgodisho bya gagoe, ge a re go tatagoe: u mphe kabelo ea lehumo e ntebanego. Ea 2: ke ge a khudugetše nageng e kgole, a phela ka go sa tsebalege. Ea 3: ke ge a thoma go hloka, mme a thoaloe, a romeloe go disha dikolobe. Ea 4: ke ge a bolaoa ke tlala, a nyaka go tlatša mpa ea gagoe ka mekgatša e leoago ke dikolobe, eupya a se ke a neoa ke motho.

3. Tsela e, a pholoshitšoe go mo go eona, e na le dikgato tše nne le eona, ke di fe?

Ea 1: ke ge a boetše ka go eena, 'mme a ithsola. Ea 2: ke ge a tsoğa go ea go tatagoe go kgopela thsoarelo. Ea 3: ke ge tatagoe a mo lebalela. Ea 4: ke ge a boela a amogeloa lapeng la tatagoe.

4. Na moroa e mogolo ge a ngangana le tatagoe, o a reresha na?

Aoa, gobane le koa legodimong go tla ba le thabo ka baka la modiradibe o te, ge a sokologa.

Thuto e fetšoa ka go bea thapelo, le ka kopelo.

### Thuto ea 17.

Thuto e thongoa ka go opela kopelo, le ka thapelo.

Go boeletšoa thuto ea 16.

Go ishoa pele ka thuto ea 17, she:

### Mosamaria eo kgaogelo.

E ngoadiloe „Ditaba“, letl. la 171, 2 (Luk. 10, 25—37).

Dipotšišo she di:

1. Bophelo byo bo sa felego u tla bo rua, ge u dira eng? Ge ki rata Morena Modimo oa ka, gape ge ki rata oagesho.

2. Go rata Modimo ke go reng?

Go rata Modimo ke ge ki boloka melao ea gagoe.

3. A Modimo a ka se ke a gana le bophelo byo bo sa felego, mohla u sela molao ka baka la go fokola ga nama?

Mohla ki sentše, ki tla kgopela thsoarelo go Yesu mopholoshi oa ka, gomme o tla nkgaoğela.

4. Ke go rata oageno, ge u dira ka mokgoa oa motho o fe?

Ge ki dira ka mokgoa oa mosamaria eo kgaogelo.

5. O bonchitše lerato le le rereshago ka ge a dira byang?

Mohla a bona motho eo a le makgatheng a go hua:

1) ga a ka a mo sekisha gore na u oagesho na?

2) 'mme a upya a mo gaogela, le ge a sa tsebe gobane monna eo ke mang;

3) a akgofa go mo alafa;

4) a mmea lekabeng la gagoe go mo isha koa motseng;

5) ge a tloga bosasa, a fa mong oa ngoako chelete gore a mo oke.

6. Morena Yesu o oketša keletšo e rego eng?

E rego: sepela, le oena u dire byalo.

Thuto e fetšoa ka go bea thapelo, le ka kopelo.

### Thuto ea 18.

Thuto e thongoa ka go opela kopelo, le ka thapelo.

Go boeletšoa thuto ea 17.

Go ishoa pele ka thuto ea 18, she:

### Mohlanka oa tona ea Kapernaum.

E ngoadiloe „Ditaba“ letl. la 152, 2 (Math. 8, 5—13).

Dipotšišo she di:

1. Morena Yesu o tumisha eng go tona ea Kapernaum?

O tumisha tumelo e kgolo ea gagoe.

2. Tumelo e kgolo ea gagoe ea bonoa ka ge a dira eng?

1) ka ge tona eo a chabela go Yesu mohlang oa tlalelo;

2) ka boikokobetšo bya gagoe, gobane a ipolela a re: Morena, ga ki a soanela, ge u ka tsena ka tlase ga tlaka ea ka.

3) ka ge a holofela lentšu la Yesu.

3. Tumelo ea gagoe e mo thushitše na?

E, gobane mohlanka oa gagoe a fola boloetši.

Thuto e fetšoa ka go bea thapelo, le ka kopelo.

### Thuto ea 19.

Thuto e thongoa ka go opela kopelo, le ka thapelo.

Go boeletšoa thuto ea 18.

Go ishoa pele ka thuto ea 19, she:

### Tsošo ea Latsarus.

E ngoadiloe „Ditaba“, letl. la 182—184 (Yoh. 11, 1—44).

Dipotšišo she di:

1. Taba ea tsošo ea Latsarus e re ruta eng?

E re ruta gore: Yesu o na le matla a go tsosha bahu.

2. Lentšu la Yesu le, a homotšago Martha ka lona, ge a tlile go mo gahlanetša, le reng?

Ki nna tsoğo le bophelo. Eo a dumelago go nna o tla phela, le ge a huile. Gomme e mongoe le e mongoe e a phelago à dumela go nna, a ka se ke a ba a hua go isha go sa felego.

3. Pelaelo ea Martha ea ge Yesu a tlile lebitleng, ke e fe?

A belaela a re: Morena, mohu eo o shetše a nkga, gobane ke la bone ge a huile.

4. Morena Yesu a bonagatša matla a gagoe godimo ga lehu, ka ge a dirang?

Ka ge a bitša ka lentšu le legolo, a re: Latsarus, tla

u tšoe! Gomme mohu a tsoga bahung, 'mme a tšoa lebitleng la gagoe.

Thuto e fetšoa ka go bea thapelo, le ka kopelo.

### Thuto ea 20.

Thuto e thongoa ka go opela kopelo, le ka thapelo.

Go boeletšoa thuto ea 19.

Go ishoa pele ka thuto ea 20, she:

### Dihlokofalo le lehu la Yesu Kriste.

Di ngoadiloe „Ditaba“, letl. la 198—212 (Math. 26—27, Mark. 14—15, Lukas 22—23, Yoh. 18—19).

Moruti oa phuthego a ke a itokishe pele ga botsebotse ka go bala ditaba ka moka koa gae, gore a kgone go laodishetša barutioa ba gagoe tšona ka go di bolela ka hlogo.

Mo gare ga dipotšišo a go be le tšona tše:

1. Morena Yesu, ge a tlaleloa byalo koa Gethsemane 'mme a katana le Modimo thapelong, ke ka baka lang?

Ke gobane o be a tlile go ikgafela go Tatagoe oa magodimong, go ea go dira modiro o mogolo oa go pholosh batho ka go ba huela phateng ea sefapano. Ga a ka a boifa lehu la nama; e fo ba go choga fela, gobane molato oa dibe tša batho o, a eago go lefa ona, e be e le o mogolo kakudu; gobane e be e le oa batho ba mabaka aohle le oa ba lefase ka moka. Gomme molato o mogologolo ó oa imela kakudu.

2. Ge baperista ba bagolo ba ahlola Yesu, ba mo fa molato o fe?

Molato oa gore: o rogantše Modimo; gobane o be a re: ki nna Kriste, Moroa oa Modimo!

3. A Morena Yesu o boletše maaka, ge a ipolela a re: ki nna Moroa oa Modimo?

Aoa, ga se maaka; gobane ke Eena Modimo ka go reresha, eo a tsoetšoe go ke Tata go se nago mathomo.

4. Bohlati byo bobotse byo, Yesu a bo beilego mohla a sekishoa ke Pilatus, ke bo fe?

Pilatus o be a botšiša a re: A ke gore u Morena? Gomme Yesu a fetola a re: U boletše, ki nna Morena; ki tletše lefaseng gore ki be hlatsi ea theresho; e mongoe le e mongoe e lego oa theresho, o koa lentšu la ka!

5. Mafoko a shupago, á Yesu a boletšego ona, ge a le phateng ea sefapano, ke a fe?

1) Tate, u ba le balele, gobane ga ba tsebe se ba se dirago!

2) Mosadi, bona, moroa oa gago sho! (go Yohannes a re) Bona, mma go sho!

3) Ruri, ki a gu botša, lehono u tla ba le nna para-deising!

4) Modimo oa ka, Modimo oa ka, u ntlogeletšeng?

5) Ki nyoriloe!

6) Go phethiloe!

7) Tate, diatleng tša gago ki gafela moea oa ka!

6. Paseka ke go reng?

Ke gore thlabo.

7. Leina la „Paseka“ ba le tšere kae?

Ba le tšere go Paseka (thlabo) ela e diregilego koa Egipte, ge ba Israel ba phologa ka baka la madi a koanyana, mohla morongoa a sepela mashegogare go bolaea maetšibulo a baegipte.

8. Ke ka baka lang ge monyanya oa lehu le tso go ea Morena o bitšoa oa Paseka?

Go hlabiloe Yesu Kriste koana ea Modimo, gomme ka madi a gagoe go pholoshitšoe lefase.

Thuto e fetšoa ka go bea thapelo, le ka kopelo.

### Thuto ea 21.

Thuto e thongoa ka go opela kopelo, le ka thapelo.

Go boeletšoa thuto ea 20.

Go ishoa pele ka thuto ea 21, she:

### Tsogo ea Morena Yesu.

E ngoadiloe pukung ea „Ditaba tša Bible“, letl. la 212—214 (Mark. 16, Yoh. 20, Math. 28).

Dipotšišo she di:

1. Mohla Morena Yesu a tsoga bahung, a direloa ke legodimo le lefase; ke gore tša mo direla ka ge di dirang?

Lefase la shishinyega, gomme legodimong goa theoga morongoa oa Modimo, go tla go kgokolosha lebye modyakong oa lebitla.

2. Manaba a Yesu a be a lekile go thibela tso go ea Yesu ka go dirang?

Ba be ba beeletša lebye ka seka sa bona, gomme ba lota lebitla ka baletedi; eupya Morena Yesu a ba palela; a tsoga bahung ka matla a magolo.

3. Baletedi ba lebitla ba dira byang, ge Yesu a tsoga bahung?

Ba roromela ka go mo choga, ba ba byaloka bahu.

4. Basadi ba barapedi ba fioa taelo e fe ke Morena e a tsogilego bahung?

A re: sepelang, le begele bana besho taba eo.

5. Tsogo ea Morena Yesu e tiisha modiro o fe oa gagoe?

E tiisha modiro oa pholoshō; kagobane ka go tsoga bahung, Morena a laetša gore: ruri, ke Eena Moroa oa Modimo e a nago le matla a go pholoshā batho dibeng le lehung le matleng a Sathane.

6. Ka tsogo ea Yesu re filoe kholofelo e fe?

E ea gore byaloka ga Yesu a tsogile bahung, le rena re tla tsoga byalo, gore re phele le Morena mahlatsing ka mehla le ka go sa felego.

Thuto e fetšoa ka go bea thapelo, le ka kopelo.

### Thuto ea 22.

Thuto e thongoa ka go opela kopelo, le ka thapelo.  
Go boeletšoa thuto ea 21.

Go ishola pele ka thuto ea 22, she:

### Letšatši la Pentekoste.

A go thongoe ka Thotogelo ea Morena Yesu, ka mo e ngoadiloego pukung ea „Ditaba“, letl. la 218—219 (Ditiro 1, 4—11). E ka rutoa ka boripana. — Ea Letšatši la Pentekoste e ngoadiloe „Ditaba“, letl. la 219—221 (Ditiro 2, 1—43).

Dipotšišo she di:

1. Mohla Morena Yesu a rotoģela legodimong, a fa barutioa ba gagoe taelo e fe?

Taelo ea gore: ba sepedishe lefoko la Modimo gare ga baheitene. Taelo eo e re: Eang lefaseng ka moka, le koatše Ebangedi go babopya ka moka. E a dumelago, gomme a kolobetšoa, o tla phologa; eupya e a sa dumeleģo o tla tšuo.

2. Gape a ba holofetša eng?

A ba holofetša gore: le tla fioa matla a Moea e mokgethoa e a tlaģo tla godimo ga lena.

3. Moea e mokgethoa o tlile go ba fe?

Go barutioa ba Morena le go bohle ba ba bego ba le ga mmogo ka pelo e te, ba letetše kholofedisho ea Morena.

4. A Moea e mokgethoa o sa tla go batho le ka ona mabaka ano?

E, o sa tla go barapedi bohle ba ba mo kģopelago.

5. Mohla Moea e mokgethoa a e tla go badumedi bale ba pele, oa tla ka diponcho di fe?

Poncho ea pele she: goa direģa modumo o tšoago

legodimong, o byalo ka ledimo le lethata le le ubulago, gomme modumo o oa tlala ngoako ka moka o, ba dutšego go ona. Poncho ea bobedi she: goa bonala go bona maleme a maphakģa, a byalo ka a mollo, gomme a tla a dula godimo ga e mongoe le e mongoe oa bona.

6. Byalo ge barutioa ba Morena ba tletše Moea e mokgethoa, goa direģa mohlolo o fe?

Ba thoma go bolela ka maleme a shele, ka mo Moea e mokgethoa a ba fago go bolela ka gona.

7. Batho ba Yerusalem, ge ba e koa banna bao ba Modimo ba bolela ka mebolelo ea mehutahuta ea batho, ba dira eng?

Ba tlabega ka moka, eupya ba bangoe ba koera barutioa ba Morena.

8. Goa sokologa batho ba bakae ka letšatši leo la go tla ga Moea e mokgethoa?

Batho e ka ba ba dikete tše tharo. — Ke go theoa ga phutheģo ea mathomo ea bakreste.

9. Ge barutioa ba 12 ba Yesu ba bitšoa baapostola, ke go reng?

Ke gore: ke banna ba ba romiloego ke Yesu ka nnoshi go sepedisha lefoko la Modimo.

10. Pentekoste ke go reng?

Ke gore: letšatši la 50. — Monyanya oa go tla ga Moea e mokgethoa o bitšoa „Pentekoste“, gobane Moea oa Modimo o chollotšoe godimo ga baapostola ka letšatši la 50 kamorago ga tsogo ea Morena.

Thuto e fetšoa ka go bea thapelo, le ka kopelo.

### Thuto ea 23.

Thuto e thongoa ka go opela kopelo, le ka thapelo.  
Go boeletšoa thuto ea 22.

Go ishola pele ka thuto ea 23, she:

### Thsokologo ea Paulus.

E ngoadiloe „Ditaba“, letl. la 224—226 (Ditiro 9).

Dipotšišo she di:

1. Morena Yesu a chosha Saulus ka lentšu le le reģo eng?

Saul, Saul, u nthlomaretše eng? Ki nna Yesu eo u mo hlomereģo!

2. Ka lentšu leo Saulus a lemoshoa eng?

A lemoshoa gore:

1) ruri, Yesu eo, ba mmapotšego sefapanong, o tsogile bahung;

- 2) go hlomara badumedi ba gagoe, ke go hlomara Yesu ka nnoshi;  
 3) go loa le Yesu, ke go loa le Modimo, gobane Yesu ke Moroa oa Modimo.

3. Morena Yesu ge a sokolla Saulus ke gobane o be a mo kgethetše go dira modiro o fe?

Modiro oa go roalela leina la gagoe pele ga dichaba, le marena, le pele ga baroa ba Israel.

4. Leina le lefsa la Saulus lé, a filoego lona kolobetšong, ke le fe?

Ke Paulus.

5. Modiro o mogolo oa Paulus le ka mo a sepedishitšego lentšu la Yesu dichabeng le mo gare ga bana ba Israel, re a o laodishetšoa pukung e fe ea mangoalo?

Pukung ea ditiro tša baapostola.

Thuto e fetšoa ka go bea thapelo, le ka kopelo.

#### Thuto ea 24.

Thuto e thongoa ka go opela kopelo, le ka thapelo.  
 Go boeletšoa thuto ea 23.

Go ishoa pele ka thuto ea 24, she:

#### Molao oa 1.

Dipotšišo she di:

1. Leina la Modimo oa rena ke mang?

Ke Yehofa.

2. O gana eng go oena?

O gana ge ki direla medimo e shele.

3. Ba Israel ge ba tlogile Egipete go ea Kanaan, ba itirela modimo o shele o fe?

Namane ea gauta.

4. Medimo e shele ea mabaka ano ke a fe?

Ke ditaola, le koela ea baheitene, le thapelo mabintleng a dikgoshi, le tše dingoe.

5. Gape ke go direla medimo e shele, ge u reng ka dilo tša lefase?

Ge ki di boifa go fetisha Modimo Yehofa, le ga e le ge ki di rata le ga e le go di bota go fetisha Yehofa.

6. Modimo Yehofa o nyaka eng go oena?

Gore ki mmoife, le go mo rata, le go mmota ka gogolo go fetisha dilo ka moka.

Thuto e fetšoa ka go bea thapelo, le ka kopelo.

#### Thuto ea 25.

Thuto e thongoa ka go opela kopelo, le ka thapelo.  
 Go boeletšoa thuto ea 24.

Go ishoa pele ka thuto ea 25, she:

#### Molao oa 2.

Dipotšišo she di:

1. Molao oa 2 o gana ge u dira'ng?

O gana ge ki bolela leina la Modimo ka lefela.

2. Eo a tlogo chaba go bolela leina la Modimo ka lefela, ke motho o fe?

Ke eo a boifago Modimo le eo a mo ratago.

3. Ke gona re eletšoa gore re soanetše go boifa Modimo le go mo rata gore re se reng?

Gore re se roge, re se ene, re se kunye, re se aketše, re se fore ka leina la gagoe.

4. Keno e soanelago ke e fe?

Ke keno ea motho, ge a enishoa ke dikgoshi tše dikgolo.

5. Molao oa 2 o laela gore ki dire eng ka leina la gagoe?

Ki le bitše mo go beng ka moka, ki le rapele, ki le rate, ki le leboge.

6. Tona ea Kapernaum ea tseba go bolela leina la Modimo ka go loka, ke ge a dira eng?

A rapela Yesu, mohla mohlanka oa gagoe a le mo go beng.

Thuto e fetšoa ka go bea thapelo, le ka kopelo.

#### Thuto ea 26.

Thuto e thongoa ka go opela kopelo, le ka thapelo.  
 Go boeletšoa thuto ea 25.

Go ishoa pele ka thuto ea 26, she:

#### Molao oa 3.

Dipotšišo she di:

1. Letšatši la go khutša le beiloe ke mang?

Le beiloe ke Yehofa, mohla a feditše go dira lego-dimo le lefase.

2. U kgetha letšatši la go khutša ka go dira eng?

Ka go ea kerekeng go koa lentšu la Modimo.

3. Ke go nyatša ditaba tša Modimo le lentšu la gagoe, ge u dira'ng?

Ge ki chaba kereke ka letšatši la Morena, 'mme ki ikela modirong oa ka.

4. Menyanya e megolo ea kereke ke e fe?  
Oa matsoalo a Morena, oa lehu le tsogo ea Morena,  
oa go tla ga Moea e mokgethoa.  
Thuto e fetšoa ka go bea thapelo, le ka kopelo.

#### Thuto ea 27.

Thuto e thongoa ka go opela kopelo, le ka thapelo.  
Go boeletšoa thuto ea 26.  
Go ishoa pele ka thuto ea 27, she:

#### Molao oa 4.

Dipotšišo she di:

1. Batsoadi ba rena ke bomang?  
Ke tata, le mma, le bomakgolo a rena.
2. Beng ba rena ke bomang?  
Ke dikgoshi, le baruti, gape ke bohle ba ba nago le bogolo mo lapeng, le motseng, le sekolong, le kerekeng, le mmushong.
3. Bao ka moka re se ke ra ba reng?  
Re se ke ra ba nyatša le ga e le go ba befedisha.
4. Eupya re tla dirang ka bona?  
Re tla ba godisha, le go ba direla, le go ba koa, le go ba rata.
5. Ge batsoadi le ga e le beng ba gago ba ka gu laela modiro o mongoe o gananago le melao ea Modimo, gona u tla reng?  
Ki tla fela ki ba godisha, eupya modiro o gananago le melao ea Modimo nka se ke ka o dira.
6. Tša Yesu le ka mo eena a godishitšego batsoadi ba gagoe, u di rutile ka taba e fe?  
Ka taba ea „Yesu ngoana monyanyeng oa Paseka“.  
Thuto e fetšoa ka go bea thapelo, le ka kopelo.

#### Thuto ea 28.

Thuto e thongoa ka go opela kopelo, le ka thapelo.  
Go boeletšoa thuto ea 27.  
Go ishoa pele ka thuto ea 28, she:

#### Molao oa 5.

Dipotšišo she di:

1. Mmolae-batho oa mathomo eo, u rutiloego taba ea gagoe, ke mang?  
Ke Kain, o bolaile Abel.

2. Ke ka baka lang ge Modimo a gana polao?  
Ke gobane batho ba bopilo e ka sesoancho sa Modimo.

3. Go ipolaea ke sebe na?  
E, gobane mong oa bophelo bya rena ke Modimo, ke eo a re bopilego.

4. Motho ke mmolae-batho ge a dirang ka ngoanabo?  
Ge a mo koisha bohloko, le go mo dira boshula mmeleng oa gagoe.

5. Modimo o laela gore re upye re reng ka ngoanabo rena?  
Re mo hlatlole, re mo loele mo go beng ka moka ga mmele oa gagoe.

6. Ga e le manabeng a rena re tla dira byang?  
Re tla dira ka mokgoa oa Yesu. Eena a ba rapelela a re: Tate, u ba lebalele, gobane ga ba tsebe se ba se dirago.  
Thuto e fetšoa ka go bea thapelo, le ka kopelo.

#### Thuto ea 29.

Thuto e thongoa ka go opela kopelo, le ka thapelo.  
Go boeletšoa thuto ea 28.  
Go ishoa pele ka thuto ea 29, she:

#### Molao oa 6.

Dipotšišo she di:

1. Tšeano ke eng?  
Ke kgoerano le kopano e kgethoa gare ga monna o te le mosadi o te.
2. Tšeano e kgethoa eo e laetšoe ke mang?  
E laetšoe ke Modimo paradeising.
3. Ba banntši ge ba dira bootsoa, ke ka molato o fe?  
Mo gongoe ke ka molato oa bobodu bya bona, mo gongoe ke botagoa, mo gongoe ke gobane e le batho ba ba kgahlishoago ke metlae ea dichila.
4. Eo a tlogo sepela kgethegong, a ba le dihlong go bootsoa ka dipolelo le ka mediro, ke motho o fe?  
Ke eo a boifago Modimo le eo a mo ratago.  
Thuto e fetšoa ka go bea thapelo, le ka kopelo.

#### Thuto ea 30.

Thuto e thongoa ka go opela kopelo, le ka thapelo.  
Go boeletšoa thuto ea 29.  
Go ishoa pele ka thuto ea 30, she:

## Molao oa 7.

Dipotšišo she di:

1. Ke go utsoa, ge motho a dira eng?  
Ge a hlakola oagabo ditheko le dithoto tša gagoe.
2. Gape ke go utsoa, ge motho a di tšea ka'ng?  
Ka dithekisho tša go fora, le ka go reka ka mano.
3. Molao o laela gore re dire byang?  
Re dirishe oagesho go thakga le go boloka dithoto le maruo a gagoe.
4. Ke mang eo a tlogo boloka molao o?  
Ke motho eo a boifago Modimo le eo a mo ratago.  
Thuto e fetšoa ka go bea thapelo, le ka kopelo.

## Thuto ea 31.

Thuto e thongoa ka go opela kopelo, le ka thapelo.  
Go boeletšoa thuto ea 30.

Go ishoa pele ka thuto ea 31, she:

## Molao oa 8.

Dipotšišo she di:

1. Ke go bea bohlati bya maaka go oageno, ge u reng ka eena?  
Ge ki mo aketša ka go mo fora, ge ki mo shitanya le batho, ge ki mo seba, le ga e le go mo phara ka tša maaka.
2. Ba ba setšego molao oa 8, mohla ba hlokofatša Yesu lapeng la moperiste e mogolo, ke ba fe?  
Ke baperiste ba bagolo, le bagolo ba sechaba, le ba mangoalo. Ba tsoma bohlati bya maaka go Yesu, gore ba tle ba mmolae.
3. Modimo o re laela eng ka molao oa 8?  
Re upye re pheka ganele oa gesho, re mmolele ga botse, gomme re fetole tšohle ga botse.
4. Motho e mongoe eo u mo rutiloego gore o boleletše ngoanabo ga botse, ke mang?  
Ke Yonathan, moroa oa Saul; a bolela Dafid ga botse go tatago, gore a se ke a bolaea Dafid.
5. Mong oa bao ba ba bolelago maaka ke mang?  
Ke Sathane.
6. Kgoshi ea theresho ke mang?  
Ke Yesu eo a beilego bohlati bya theresho pele ga Pilatus, ge a re: Ki tletše lefaseng, gore ki be hlatsi ea theresho; e mongoe le e mongoe e a lego oa theresho, o koa lentšu la ka.  
Thuto e fetšoa ka go bea thapelo, le ka kopelo.

## Thuto ea 32.

Thuto e thongoa ka go opela kopelo, le ka thapelo.  
Go boeletšoa thuto ea 31.

Go ishoa pele ka thuto ea 32, she:

## Molao oa 9 le Molao oa 10.

Dipotšišo she di:

1. Ka molao oa 9 le oa 10 go kgaloa eng mo go rena?  
Go kgaloa ditumo tše mpe ka moka.
2. Ke go duma ntlo ea oageno, ge u reng?  
Ge ki nyaka go tšea bohua le ntlo ea oagesho ka mano, le ga e le ge ki di tlisha go nna ka mokgoa o e kego ke oa go loka.
3. Molao oa 9 o gu laetša go reng?  
Gore ki loele oagesho, ki mo direle, gore a ithsoarele bohua le ntlo ea gagoe.
4. Ka molao oa 10 re se ke ra duma eng?  
Mosadi oa oagesho, le modiredi oa gagoe, oa monna le oa mosadi, le dikgomo, le tšohle tše e lego tša gagoe.
5. Ke motho o fe eo a tlogo chaba go timeletša oagabo dikgomo, le go mo amoga mosadi, le ga e le go mo tlogetša bahlanka?  
Ke eo a boifago Modimo, le eo a ratago Modimo.
6. Modumedi e mobyalo o tla dira byang go mosadi le go bahlanka ba ngoanabo?  
O tla ba laetša gore ba fele ba dira tše di ba soanetšego.  
Thuto e fetšoa ka go bea thapelo, le ka kopelo.

## Thuto ea 33.

Thuto e thongoa ka go opela kopelo, le ka thapelo.  
Go boeletšoa thuto ea 32.

Go ishoa pele ka thuto ea 33, she:

## Bofelo bya melao.

Dipotšišo she di:

1. Yehofa Modimo o boncha bogale bya gagoe ka mafoko a rego eng?  
Ki tla otlala bohle ba ba selago melao e.
2. A re o tla lata bokgopo bya botata go bana ba bona go fihla neng?  
Go fihla molokong oa boraro le oa bone.



3. Modimo o re kgalema byalo go reng?

Gore re chabe bogale bya gagoe, 'mme re se sele melao e byalo.

4. Bohle ba ba soerego melao e, o ba balela eng?

Kgaogelo le tšohle tše dibotse.

5. O tla ba shegofatša go isha kae?

Go isha molokong oa makgolo a lesome.

6. Gore re abeloe chegofatšo e byalo, ke gona re soanetšego go dirang?

Go mo rata, le go mmota, le go dira ka melao ea gagoe ka go rata.

7. A u ka kgona u boloka melao e ga botse?

Nka se ke ka kgona ka matla a ka ka nnoshi.

8. Melao e thusha eng, ge u sa kgone go e boloka ka matla a gago ka nnoshi?

E nthusha go tseba gobane ki nna modiradibe.

9. Go itseba gobane ke oena modiradibe, go tla gu tsomisha mang?

Yesu Kriste, Moroa oa Modimo, eo a ka mpholoshago.

10. U tla bolokega legodimong, ge u reng?

Ge ki dumela Modimo Tata, Moroa, Moea e mokgethoa.

Thuto e fetšoa ka go bea thapelo, le ka kopelo.

#### Thuto ea 34.

Thuto e thongoa ka go opela kopelo, le ka thapelo.  
Go boeletšoa thuto ea 33.

Go ishoa pele ka thuto ea 34, she:

#### Kgaoganyo ea 1 ea tumelo.

Dipotšisho she di:

1. Ka kgaoganyo ea 1 ea tumelo u rutoa go dumela mang?

Modimo Tate, Eo matla ka moka, mohlodi oa legodimo le lefase.

2. Dibopya tša koa legodimong tše a di bopilego, ke di fe?

Ke barongoa.

3. Barongoa ke eng?

Ke meoea e Yehofa a e romelago go boloka barapedi le go sola ba babe.

4. Barongoa ba, u ba tsebago ka ditaba tše, u kilego ua rutoa tšona, ke ba fe?

Ke Kerubim eola e a letelago tsela ea paradeis; gape

ke barongoa ba babedi bala ba ba felegeditšego Yehofa, mohla a etela Abraham; gape ke Gabriel eo a tsebishitšego Sakarias matsoalo a Yohannes, a busha a tsebisha Maria matsoalo a Yesu; gape ke barongoa ba ba tlilego Bethlehem boshego bya matsoalo a ngoana Yesu; gape ke morongoa eo a tlilego Gethsemane go tiisha Yesu; gape ke barongoa ba ba tlilego lebitleng la Yesu, mohla a tsogile bahung.

5. Tša mo lefaseng o bopile di fe?

O bopile nna le dibopya ka moka.

6. O gu file eng, ge a gu bopile?

Mmele le moea, le mahlo le ditsebe le ditho ka moka, le bohlale le diko ka moka.

7. Gore a boloke mmele le moea oa gago, ke gona o gu file eng gape?

O mphile diaparo le dieta, le didyo le dino, le lapa le kgoro, le mosadi le bana, le chemo le dikgomo, le dithoto ka moka.

8. Modimo Tata gore a bonche pusho ea gagoe, ke gona a dira eng gape?

O mpabalela ka tšohle tša go fepa mmele le tša bophelo byo ka moka, o mpha tše nntši, o mpha ka mehla, o nchireletša poifegong ka moka, o a ntisha, o mpoloka mo go beng ka moka.

9. Tšohle tše o di dira ka baka lang?

Kagobane e le Tate, e le Modimo eo botho eo kgaogelo, e sego ka go soanela ga ka, gore nka putsoa ka tšona le ga nyane.

10. Ke gona u soanetšego go dirang?

Go mo leboga ka baka la tšona tšeo ka moka, le go mo reta, le go mo direla, le go mo koa.

Thuto e fetšoa ka go bea thapelo, le ka kopelo.

#### Thuto ea 35.

Thuto e thongoa ka go opela kopelo, le ka thapelo.  
Go boeletšoa thuto ea 34.

Go ishoa pele ka thuto ea 35, she:

#### Kgaoganyo ea 2 ea tumelo.

„Ki dumela le go Yesu Kriste“ — le go isha pele go fihla: „ba ba sepelago le ba ba huilego.“

Dipotšisho she di:

1. Ka kgaoganyo ea 2 ea tumelo re rutoa go dumela mang?

Yesu Kriste, Moroa oa Modimo, eo a re pholoshitšego.

2. Kholofedisho ea gore go tla tla Mopholoshi, e thomile neng?

E thomile mohla batho ba mathomo ba lelekiloe paradeising, ge Modimo a ba holofetša gore go tla tla Mopholoshi e a tlogo pshatla hlogo ea noga.

3. A Yehofa o bushitše a bolela gape kholofedisho ea Mopholoshi?

E, ka mabaka a morago o e boletše go Moshe le go Dafid.

4. Yehofa ge a tiisha kholofedisho e, a bolela ka molomo oa bomang?

Ka molomo oa bapofeti ba banntši, ba bangoe e lego Yesaya le Mika, le Haggai le Sakarya, le Maleagi.

5. Re koile molomo oa mang ge a bolela a re: Yesu ke Moroa oa Modimo, mme o amogetšoe go Moea e mokgethoa?

Re koile molomo oa Gabriel, Morongoa oa Modimo, ge a tsebisha Maria matsoalo a ngoana Yesu, 'mme a re: Moea e mokgethoa o tla theogela go oena, gomme matla a Eo-godimodimo a tla gu khurumetša; ke gona mo go kgethoa go tsoaloago ke oena, go tla bitšoa Moroa-Modimo.

6. Moroa oa Yehofa, Modimo oa legodimong, o be a kgona go belegoa byang ke mosadi, a thsoenyoa mehleng ea Pontio Pilato, a bapoloa sefapanong, a hua, a fihloa lebitleng?

Ke go ikokobetša ga gagoe. O be a ithlakola ka nnoshi, a tšea sebopego sa mohlanka, a ba e a soanago le batho.

7. Kagobane Yesu o dirile modiro o oa go pholoshela lefase ka madi a gagoe, ke gona Modimo Tata a mo diretšego eng?

O mo godishitše kakudu.

8. Kgodisho eo e boleloa ka mafoko a rego eng?

Yesu a fologela mo go lego bahu, a tsoga bahung ka letšatši la boraro, a rotogela legodimong, gomme a dula ka letsogong le letona la Modimo, Tata eo matla ka moka, mo a tlogo boa gona go tlo ahlola ba ba sepelago le ba ba huilego.

9. Go fologela mo go lego bahu e ka ba kgodisho byang?

Yesu o ile gona go iponcha go bahu ba mehla ea kgale, gore ke Eena Mopholoshi eo, ba bego ba mo letetše, ge ba sa phela lefaseng. Gomme kagobane o be a fentše lehu, a ea felong ga bahu go hurolla bahu ba badumedi, gore ba tsoge bahung le Eena, ba ee paradeising ea Modimo.

10. Tsogo ea Yesu le thotogelo ea gagoe di re holofetša eng?

Di re holofetša gore le rena re tla tsoga bahung, ra rotogela go Mong oa rena Yesu.

11. Yesu eo a bushago tšohle, a le ka letsogong le letona la Modimo Tata eo matla ka moka, o tla boea neng?

Ka letšatši la mafelelo; ke mo a tlogo ahlola ba ba sepelago le ba ba huilego.

Thuto e fetšoa ka go bea thapelo, le ka kopelo.

### Thuto ea 36.

Thuto e thongoa ka go opela kopelo, le ka thapelo. Go boeletšoa thuto ea 35.

Go ishoa pele ka thuto ea 36, she:

### Kgaoganyo ea 2 ea tumelo.

„Ke go reng? Ke gore: Ki dumela gobane Yesu Kriste“ — le go isha pele go fihla: „a busha ka go sa felego. Tšeo ke go reresha ruri.“

Dipotšišo she di:

1. Taba ea gore: Yesu Kriste ke Eena Modimo ka go reresha, — e boleloa ka mafoko a rego eng?

O tsoetšoe ke Tata go se nago mathomo.

2. Taba ea gore: Yesu Kriste ke motho ka go reresha, — e boleloa ka mafoko a rego eng?

E a belegiloego ke Maria kgarebe.

3. Eena eo ke Mong oa gago ka baka lang?

Gobane o mpholoshitše nna eo ki lego mosenyi le molahlegi.

4. Gape ke Eena Mong oa gago ka baka lang?

Gobane o itiretše nna, o nthekile dibeng ka moka le lehung le matleng a Sathane.

5. O gu rekile e sego ka eng, e lego ka eng?

E sego ka gauta le selfera (ke gore e sego ka chelete), e lego ka madi a gagoe a makgethoa a bohlokoa, le ka go thsoenyega le go hua ga gagoe a se na molato.

6. Theko e kgolo e o e nchitše neng?

Mohla ba mo hlokofatša, gape mohla a e hua phateng ea sefapano.

7. O gu rekile byalo ka baka lang?

Gore ki tle ki be oa gagoe, ki phele mmushong oa gagoe ka tlase ga gagoe, gomme ki mo direle tokong le letagong le lehlogonolong le le sa felego.

8. Na Morena Yesu o na le matla a go re fa tšona tšeo ka moka?

E, gobane Yesu eo a huilego phateng ea sefapano, o tsogile bahung, oa phela, oa busha ka go sa felego.

Thuto e fetšoa ka go bea thapelo, le ka kopelo.

### Thuto ea 37.

Thuto e thongoa ka go opela kopelo, le ka thapelo.  
Go boeletšoa thuto ea 36.  
Go ishoa pele ka thuto ea 37, she:

#### Kgaoganyo ea 2 ea tumelo.

Yesu „o nthebile dibeng ka moka le lehung le matleng a Sathane“.  
Dipotšišo she di:

1. Morena Yesu o nthebile dibeng, ke go reng?  
Ke gore o lefile molato oa dibe tša ka; ke eona theko e, a nthebilego ka eona.

2. Byalo ge u le e a rekiloego ke Eena, u soanetše go dira byang?

Ki soanetše go chaba go dira sebe, ki leke go kgahlisa mong oa ka ka go boloka melao ea gagoe.

3. Morena Yesu o nthebile lehung, ke go reng?  
Ke go ntsebisha gore: ki motho oa Yesu, gomme ge ki e hua, barongoa ba tla nkisha go mong oa ka legodimong, a mpha bophelo byo bo sa felego.

4. Morena Yesu o gu rekile matleng a Sathane, ke go reng?  
Ke gore: Sathane ga a sa na le matla a go ntahlela helleng, gobane ga ki sa le oa Sathane, ki rekiloe ke Yesu.

5. Ge u le motho oa Yesu byalo, u tla dira byang ka mediro ea Sathane?

Nka se sa e gomarela, eupya ka lebaka ka moka la bophelo byo, Modimo a sa mphilego byona mono lefaseng, ki tla soara mediro ea Modimo feela.

Thuto e fetšoa ka go bea thapelo, le ka kopelo.

### Thuto ea 38.

Thuto e thongoa ka go opela kopelo, le ka thapelo.  
Go boeletšoa thuto ea 37.  
Go ishoa pele ka thuto ea 38, she:

#### Kgaoganyo ea 2 ea tumelo.

Yesu o nthebile: „e sego ka gauta le selfera, e lego ka madi a gagoe a makgethoa a bohlokoa, le ka go thsoenyega le go hua ga gagoe a se na molato.“

Dipotšišo she di:

1. Ke kabakalang ge Yesu a sa ka a gu reka ka gauta le selfera, e lego chelete?

Ke gobane ka chelete go rekoa tša mo lefaseng leno

feela, gomme moea o, ki nago le ona mo mmeleng oa ka, ga se oa lefase leno, o tšoile legodimong go Modimo.

2. Madi a Yesu a ka ba byang le matla a magolo a go mpholoshia?

Ke gobane ke madi a Moroa oa Modimo eo a tšoilego legodimong, eo a se nago sebe le molato.

3. Morena Yesu o pholoshitše batho ba fe?

O pholoshitše batho ka moka, gobane „o rata gore batho ka moka ba pholoshoe, gomme ba fihle tsebong ea theresho“.

4. Byalo ke kabakalang, ge ba banntši ba lahlega helleng?

Ke gobane ga ba dumele Yesu e a re pholoshitšego.

5. Ke bomang ba ba tlogo ea legodimong, ba pholoshitšoe ka madi a Yesu Kriste?

Ke bohle ba ba ithsolago ruri kabakala sebe, 'mme ba dumela Yesu Kriste Mopholoshi oa bona.

Thuto e fetšoa ka go bea thapelo, le ka kopelo.

### Thuto ea 39.

Thuto e thongoa ka go opela kopelo, le ka thapelo.  
Go boeletšoa thuto ea 38.  
Go ishoa pele ka thuto ea 39, she:

#### Kgaoganyo ea 3 ea tumelo.

Dipotšišo she di:

1. Moea e mokgethoa o bonagaditšoe neng?

Ka letšatši la Pentekoste ea pele, mohla Modimo Tata le Moroa ba mo rometšego lefaseng.

2. Kereke e kgethoa keng?

Ke kopano ea badumedi ba Yesu Kriste.

3. Ge go boleloa gore Kereke e te, ke go reng?

Ke gore Kereke ea Yesu Kriste e fo ba e te, le ge mehuta ea dikereke e le e menntši, e lego ea Roma, le ga e le ea Anglikan Church, le ga e le ea Freechurch, le ga e le ea Wesleyan, le ga e le ea Luther, le ga e le tše dingoe. Ka moka ga tšona e fo ba kereke e te ea Yesu Kriste.

4. Kereke ea gesho e bitšoa ea Luther ka baka lang?

Moruti Doktor Martinus Luther ke eo a e mphsafaditšego, a e tsosha gape mohla e bego e senyegile.

5. Kagobane u'sa kgone go dumela go Yesu Kriste, Morena oa gago, le ga e le go tla go Eena ka bohlale bya gago le ka matla a gago ka nnoshi, ke gona Moea e mokgethoa a dirilego eng?

O mpiditše ka Ebangedi, o mponetše ka dineo tša gagoe, o kgethile, o mpolokile tumelong e reresago.

6. O gu biditše ka Ebangedi ke go reng?

Ke gore o romile lentšu la gagoe, gore ki kgobeloe le bakreste ka moka ba lefaseng, go mo direla kerekeng ea gagoe.

7. O gu bonegetše ka dineo tša gagoe, ke go reng?

Ke gore o nthutile melao ea gagoe, gape o nthutile tša Yesu Kriste, Mopholoshi oa ka.

8. O gu kgethile, ke go reng?

O ntahlitšhe bobbe, gomme o nthsoarishitše botse le bothakga.

9. O gu bolokile tumelong e rereshago, ke go reng?

Ke gore o mpelokela go Yesu Kriste, gore ki se hloe ki sa hlanoga gape tumelong.

10. Modiro o Moea e mokgethoa, a o dirago go rena, o bitšoa „Kgetho“. Re tla kgethega, ge re dira eng?

Ge re ithsola le go sokologa.

11. Go ithsola ke go reng?

Ke ge motho a ipona molato oa dibe, 'mme a e koa bohloko bakeng sa dibe tša gagoe.

12. Go sokologa ke go reng?

Ke ge motho eo a ithsolago a lahla mekgoa le mediro e sa lokagō ka moka, 'mme a ikgafela Yesu, go direla Eena ka pelo ka moka.

13. Moea e mokgethoa o lebalela nna le badumedi ka moka melato eohle ka mehla le ga e le e menntši, ke go reng?

Ke gore: o tsosha tumelo pelong tša rena, gore re holofele tebalelo ea dibe, 'mme re dumele ka pelo ka moka, gore ruri Modimo o re lebaletše dibe ka baka la Yesu eo a re huetšego phateng ea sefapano (Modimo o re lokafatša).

14. Ge a tla ntossha le bahu ka letšatši la mafelelo, go tla direga byang?

Ka letšatši la mafelelo go tla tsoga mmele oa ka bahung, gomme moea oa ka o bilego o ile legodimong go Modimo, o tla boea gona, gomme ka mokgoa o byalo ki tla boela ki e ba motho gape.

15. O tla fa nna le bohle ba ba dumetšego go Yesu Kriste bophelo byo bo sa felego, ke go reng?

Mohla ki tsogile bahung, ki tla fioa madulo le Yesu mo lefaseng le lefa lé, a tlogo dira lona; gona ki tla phela ruri; kagobane lehu le ka se hloe le e ba gona, le ga e le manyami, le bohloko di ka se hloe di e ba gona, gobane tša pele di fedile.

Thuto e fetšoa ka go bea thapelo, le ka kopelo.

#### Thuto ea 40.

Thuto e thongoa ka go opela kopelo, le ka thapelo.  
Go boeletšoa thuto ea 39.

Go ishoa pele ka thuto ea 40, she:

#### Kgaoganyo ea 3 ea tumelo.

„Moea e mokgethoa o tla ntossha le bahu ka moka ka letšatši la mafelelo, gomme o tla fa nna le bohle ba ba dumetšego Yesu Kriste bophelo byo bo sa felego.“

Dipotšisho she di:

1. Moea e mokgethoa o tla tsosha bomang?

O tla tsosha nna le bahu ka moka, ke gore batho ka moka ba ba bego ba phela lefaseng, ba ba lokilego le ba kgopo.

2. Go tla diroa byang ka ba ba tsogilego bahung ka letšatši la mafelelo?

Ba e lego ba Yesu, ba tla fioa mmele o mofsa oa letago, 'mme ba tla dula le mong oa bona, ba phela le Modimo ka go sa felego.

3. Ba babe ba tla fioa mmele o mobyang, mohla ba tsoga bahung?

Ba tla fioa mmele o mobe, 'mme ba tla lahleloa helleng ka mmele o oa bona o nyatšegago.

4. Bophelo byo bo sa felego byo, re tlogo fioa byona, keng?

Bophelo byo bo sa felego ke ge Modimo a re fa madulo motseng oa gagoe oa legodimong, mo re tlogo phela le Modimo Tata, Moroa, Moea e mokgethoa mahlatsing a se nago go fela.

5. Bophelo byo bo sa felego bo tla fioa batho ba fe?

Bo tla fioa bohle ba ba tiishetšago go dumela Yesu Kriste go fihla lehung la bona.

6. Thuto eo e soanetše go re gapeletša gore re reng?

E soanetše go re gapeletša gore re chabe mekgoa ea ba lefase, 'mme re tiee matla a go sepela ka mokgoa oa bana ba Modimo; ge re dira byalo, re tla tšea mahumo ao ka moka.

Thuto e fetšoa ka go bea thapelo, le ka kopelo.

#### Thuto ea 41.

Thuto e thongoa ka go opela kopelo, le ka thapelo.  
Go boeletšoa thuto ea 37.

Go ishoa pele ka thuto ea 38, she:

#### Tata oesho oa magodimong.

Go tla rutoa dikgopelo ka moka tše di shupago.

Kamorago go ka botšishoa gore:

1. Re kgopela eng ka kgopelo ea 1?  
Re kgopela gore: mo lefaseng ka moka a go ke go tumishoe leina la Modimo ke batho, ka ge batho ba rutoa ka bothakga le go sepela ka bothakga.
2. Re rapelela eng ka kgopelo ea 2?  
Re rapelela mmusho oa Modimo, gore o fele o ate lefaseng ka thusho ea Moea e mokgethoa.
3. Re kgopela eng ka kgopelo ea 3?  
Re kgopela gore: Modimo a fetšishe manaba a mmusho oa gagoe, go tle go sepeloe ka melao ea gagoe fela.
4. Re kgopela eng ka kgopelo ea 4?  
Re kgopela tše di thushago bophelo bya mmele oa rena.
5. Re kgopela eng ka kgopelo ea 5?  
Re kgopela tebalelo ea melato; gape re holofetša gore re tla lebalela bao ba sentšego go rena.
6. Re kgopela eng ka kgopelo ea 6?  
Re a kgopela gore: Modimo a re boloke melekong e mebe, 'mme a ke a re fenyetše eona.
7. Re kgopela eng ka kgopelo ea 7?  
Re a kgopela gore: Modimo a re pholoshe bobeng ka moka, gomme ka mafelelo a re amogele legodimong.
8. Bofelo bya thapelo bo reng?  
Ke go tumisha Modimo ka go mo holofela gore o tla re koa.
9. Amen ke go reng?  
Ke gore: E, e, go tla direga byalo.
10. Thapelo ea Morena e rata go ruta mokgoa o fe oa go rapela?  
Mokgoa oa go rapela ka mehla, ki tle ki be le Modimo, a be kgaufsi le nna ka mehla le mehla.  
Thuto e fetšoa ka go bea thapelo, le ka kopelo.

#### Thuto ea 42.

Thuto e thongoa ka go opela kopelo, le ka thapelo.  
Go boeletšoa thuto ea 38.  
Go ishoa pele ka thuto ea 39, she:

#### Sakramente ea kolobetšo.

Go rutoa temana ea 1 ea gore „Kolobetšo ke'ng?”  
Kamorago go ka botšishoa gore:

#### 1. Kolobetšo ke metsi a mabyang?

Ke metsi a kopantšoe go le taelo ea Modimo, a hlakantšoe go le lentšu la Modimo.

2. Kolobetšo ke metsi a kopantšoe go le taelo ea Modimo, ke go reng?

Ke gore kolobetšo e diroa ka taelo ea Modimo.

3. Taelo ea Modimo e, metsi a kolobetšo a kopantšoe go le eona, e reng?

E re: Eang koa lefaseng ka moka, le dire dichaba ka moka go ba barutioa ka go ba kolobetša mo leineng la Tata, le la Moroa, le la Moea e mokgethoa.

4. Lentšu la Modimo le, metsi a kolobetšo a hlakantšoe go le lona, ke le fe?

Ke le, Moruti a bolela go lona, mohla a kolobetša motho, le le rego: Ki gu kolobetša ka leina la Tata, le la Moroa, le la Moea e mokgethoa.

5. Bao ba beiloego ke Morena Yesu Kriste gore ba kolobetše batho, ke bomang?

Ke baruti.

6. Baruti ba laetšoe go kolobetša bomang?

Ba laetšoe go kolobetša ba dichaba, ke gore bohle ba ba kgopelago go amogeloa sehlopheng sa bana ba Modimo.

7. A bana ba masea ba ka kolobetšoa na?

Ba ka kolobetšoa, gobane Morena Yesu o boletše a re: Lesang bana go tla go nna, 'mme le se ke la ba thibela, gobane mmusho oa Modimo ke oa bona.

8. Maseanyana a emeloa ke bomang mohlang oa kolobetšo?

A emeloa ke dihlatsi. Ke bona ba ba tlogo emela ngoana ka go mo rapelela go fihla ge a godile, 'mme a kgona go ipolela ka nnoshi mohlang oa kamogelo ea gagoe.

Thuto e fetšoa ka go bea thapelo, le ka kopelo.

#### Thuto ea 43.

Thuto e thongoa ka go opela kopelo, le ka thapelo.  
Go boeletšoa thuto ea 39.  
Go ishoa pele ka thuto ea 40, she:

#### Kolobetšo e nea'ng goba e dira'ng?

Dipotšisho she di:

1. Kolobetšo e tlisa tebalelo ea melato, ke go reng?

Ke gore e mongoe le e mongoe e a kolobeditšoe go, o lebaleloa melato ea dibe.

2. Kolobetšo e pholasha lehung le fe?

Lehung la mmele, le la moea, le lehung le le sa felego.

3. Na ba ba kolobeditšoe go ga ba sa hua lehu la mmele?

Ba hua, fela ba tseba gobane lehu le tla ba isha go Yesu legodimong.

4. Kolobetšo e pholasha lehung la moea, ke go reng?

Ke gore e phedisha moea oa rena, gore o phele le Modimo.

5. Kolobetšo e pholasha lehung le le sa felego, ke go reng?

Ke gore e dira gore re se lahlege heleng.

6. Kolobetšo e pholasha go Sathane, ke go reng?

Ke gore e thusha gore Sathane a se ke a hloa a mphenya, le ge a ka ntsogeta.

7. Kolobetšo e nea'ng?

Polokego.

8. Ke ka baka lang ge ba banntši ba lahlega, le ge ba kolobeditšoe?

Ke gobane ba hlanogile.

9. Bakolobetšoa ba ba bolokegago ke ba fe?

Ke bohle ba ba dumelago.

10. Ke gore ba ba dumelago eng?

Ba ba dumelago gore kolobetšo e tlisha tebalelo ea melato, e pholasha lehung le go Sathane, le gobane e nea polokego e sa felego.

11. U ka tseba byang gobane kolobetšo e dira tšona tšeo ka moka?

Gobane Markus o di bolela mafelelong a Ebangedi ea gagoe, ge a re: Eo a dumelago, gomme a kolobetšoa, o tla phologa; eupya eo a sa dumelego o tla tšuo.

12. Na ge mokreste a hlanogile, go fedile le eona kgoerano e, Modimo a e dirilego le eena kolobetšong?

Aoa, Modimo o tla fela a lebelela motimedi gore a sokologe.

13. Keno ea kolobetšo e reng?

Ki gafa Sathane le mediro ea gagoe ka moka le mekgoa ea gagoe ka moka; gomme ki ikgafela oena Modimo oa goraro, Tata, Moroa, Moea e mokgethoa, gore ki tle ki be oa gago ka go botegea tumelong le go koeng go fihla bofelong bya ka. Amen.

Thuto e fetšoa ka go bea thapelo, le ka kopelo.

#### Thuto ea 44.

Thuto e thongoa ka go opela kopelo, le ka thapelo.

Go boeletšoa thuto ea 40.

Go ishoa pele ka thuto ea 41, she:

#### Metsi a ka dira byang dilo tšeo tšeo kgolo?

Dipotšisho she di:

1. Dilo tšeo tšeo kgolo tše, metsi a dirago tšona, ke di fe?

Ke tebalelo ea melato, le go pholoshoa lehung le go Sathane, gape ke polokego e sa felego.

2. Se se thushago metsi a tle a kgone go dira dilo tšeo tšeo kgolo, ke eng?

Ke lentšu la Modimo le lego gare ga metsi, gape ke tumelo e holofelago lentšu leo la Modimo.

3. Ke gore re soanetše go dumela lentšu le le rego eng?

Eo a dumelago gomme a kolobetšoa, o tla phologa, eupya eo a sa dumelego o tla tšuo.

4. Kolobetšo e bitšoa metsi a bophelo ka baka lang?

Gobane e re fa bophelo bya ruri byo bo tšoago go Modimo.

5. Dimpho tše, metsi a kolobetšo a tletšego tšona, ke di fe?

Ke tebalelo ea melato, gape ke pholoshoa ge a re pholoshia lehung le go Sathane, gape ke polokego.

6. Ke ka baka lang ge kolobetšo e bitšoa thlatso ea tsoalo e mphsa ka Moea e mokgethoa?

Ke gobane ba ba kolobetšoa go ba tsoaloo ka bofsa, 'mme ea ba batho ba bafsa ka matla a Moea e mokgethoa.

7. Ge re le ba ba lokafaditšoe go, re batho ba ba byang?

Re ba ba lebaletšoe go melato, gomme Modimo a ka se hloe a re balela dibe tša rena.

8. Re badii ba bohua bya bophelo byo bo sa felego ka kholofelo, ke go reng?

Ke gore re na le kholofelo ea gore: re sa tlo bona bophelo byo bo sa felego, mohla re tle legodimong.

Thuto e fetšoa ka go bea thapelo, le ka kopelo.

#### Thuto ea 45.

Thuto e thongoa ka go opela kopelo, le ka thapelo.

Go boeletšoa thuto ea 41.

Go ishoa pele ka thuto ea 42, she:

#### Go kolobetšoa moo ga metsi go reng?

Dipotšisho she di:

1. Adam e motala e a lego ka mo teng ga rena, ke'ng?

Ke sebe sa matsoalo, ke gore sebe se, batho ka moka ba nago le sona go tloga matsoalong a bona.

2. Ke ka baka lang ge sebe sa matsoalo se bitšoa ka leina la Adam e motala?

Ke gobane se thomile ka Adam.

3. Go te le Adam e motala go soanetše go bolaoa le go hua di fe le tšona?

Dibe le ditumo tše mpe ka moka.

4. Re tla bolaea Adam e motala ka ge re reng?

Ka ge re ithsola le go sokologa ka mehla.

5. Motho e mofsa eo a tsogago ka pelong, mohla re bolaea Adam e motala, ke'ng?

Ke pelo e mphsa e sekilego, e botse, e nago le Yesu Kriste.

Thuto e fetšoa ka go bea thapelo, le ka kopelo.

#### Thuto ea 46.

Thuto e thongoa ka go opela kopelo, le ka thapelo.

Go boeletšoa thuto ea 42.

Go ishoa pele ka thuto ea 43, she:

### Selalelo se sekgethoa goba Sakramente ea aletare.

Go rutoa temana ea 1 ea gore:

#### Selalelo se sekgethoa ke'ng?

Dipotšišo she di:

1. Se u dyago sona mo sakramenteng ea selalelo, le se u noago sona, ke eng?

Ke mmele oa makgonnthe oa Yesu Kriste, le madi a makgonnthe a Yesu Kriste, Morena oa rena.

2. U dya mmele oa Morena Yesu, ge u e dya selo se fe?

Ge ki e dya senkgoa sa selalelo se sekgethoa.

3. U noa madi a Morena Yesu, ge u e noa seno se fe?

Ge ki e noa beine ea selalelo se sekgethoa.

4. Didyo tšeo tša sakramente ea selalelo di beetšoe bo-mang, gore ba di dye, ba di noe?

Di beetšoe rena bakreste.

5. Gape re di beetšoe ke mang?

Re di beetšoe ke Kriste ka nnoshi.

6. Morena Yesu o beile neng sakramente ea selalelo?

Boshego byo a ekiloego ka byona.

7. Ge a ba fa senkgoa, a bolela a reng?

Tšeang le dye, sona seo ke mmele oa ka o neoago ka baka la lena; dirang byalo gore e be go nkgopola.

8. Ge a re: „sona ke mmele oa ka o neoago ka baka la lena!“ a rata go re botša eng?

A rata go re botša gore: mmele oa ga'gae o, re dyago ona mo selalelong, ke ona o, a huago ka ona phateng ea sefapano go re phollosa.

9. Ge a ba fa senoelo, a bolela a reng?

A re: noang sona ka moka ga lena; senoelo se ke kgoerano e mphsa mading a ka a cholloago ka baka la lena, gore le lebaleloe melato. Dirang byalo ka mehla ge le se noa, gore e be go nkgopola.

10. Morena Yesu ge a re: „senoelo seo ke kgoerano e mphsa mading a ka!“ a rata go re botša eng?

A rata go re botša gore: senoelo seo se na le madi a ka a, go diriloego kgoerano e mphsa ka ona gare ga Modimo le batho; gomme eo a noago senoelo seo, o na le kopano le Modimo ka kgoerano e mphsa e.

Thuto e fetšoa ka go bea thapelo, le ka kopelo.

#### Thuto ea 47.

Thuto e thongoa ka go opela kopelo, le ka thapelo.

Go boeletšoa thuto ea 43.

Go ishoa pele ka thuto ea 44, she:

#### Go dya le go noa mo go dira'ng?

Dipotšišo she di:

1. Ge ba re „go dya le go noa moo“, ba shupa go dya eng le go noa eng?

Ba shupa go dya mmele oa Morena le go noa madi a Morena.

2. Ke gore: go dya mmele oa Morena le go noa madi a Morena go dira eng mo go rena?

Go dira gore re neoe tebalelo ea melato le bophelo le mahlatsi.

3. Chegofatšo e kgolo e re e laetšoa ke lentšu le le rego eng?

Le le rego: mmele oa Morena o neoa ka baka la lena, gomme madi a ga'gae a cholloa ka baka la lena, gore le lebaleloe melato.

4. Mafoko ao a bolela te balelo ea melato fela. Ke ka baka lang ge Doktor Luther a okeletša a re: go fioa le bophelo le mahlatsi?

Ke gobane mo te balelo ea melato e lego gona, le bophelo le mahlatsi di gona le tšona.

5. U shetše u filoe te balelo mo kolobetšong; byalo ke ka baka lang, ge u fela u kgopela te balelo ea dibe ka selalelo se sekgethoa?

Ke gobane ki motho e a fokolago; gomme le ge ki kolobeditšoe, ki sa fela ki senya ga nntši; gomme ke gona ki soanetšego go kgopela te balelo ka mehla.

6. Ka kolobetšo go tsoetšoe motho e mofsa dipelong tša rena; byalo ka selalelo go diroa eng go motho e mofsa eo?

O fe pya ka didyo, e lego mmele le madi a Morena. Thuto e fetšoa ka go bea thapelo, le ka kopelo.

#### Thuto ea 48.

Thuto e thongoa ka go opela kopelo, le ka thapelo. Go boeletšoa thuto ea 44.

Go ishoa pele ka thuto ea 45, she:

### Go dya le go noa ka molomo go ka dira byang dilo tšeo tše kgolo?

Dipotšisho she di:

1. Dilo tšeo tše kgolo tše, ba rego di ka diroa byang ka go dya le ka go noa ka molomo, ke di fe?

Ke te balelo ea melato le bophelo le mahlatsi.

2. Dilo tšeo tše kgolo ge di sa diroe ka go dya le ka go noa fela, di diroa ke eng?

Di diroa ke lentšu le lego gona, le re: mmele oa Morena o neoa ka baka la lena, gomme madi a Morena a cholloa ka baka la lena gore le le baleloe melato.

3. Bolela mafoko ao a re tse bishago a rego dilo tšeo tše dikgolo di tšea ke eo a dumelago; a reng?

Mafoko ao a re: gomme e a dumelago lentšu le, o na le se se boleloago ke lona, ke gore o na le te balelo ea melato.

4. Ga e le bakreste ba ba sa dumelego ka pelo, mohla ba e dya senkgoa 'mme ba e noa beine ea selalelo, ba tla abeloa mmele le madi a Morena na?

E, ba tla abeloa tšona.

5. Ga e le te balelo le bophelo le mahlatsi, le tšona ba tla di fioa na?

Aoa, tšona ba ka se ke ba di fioa, gobane ba hloka tumelo.

6. Eo a dyago selalelo ka molato, o tla itielang?

O tla itiela tšuo.

Thuto e fetšoa ka go bea thapelo, le ka kopelo.

#### Thuto ea 49.

Thuto e thongoa ka go opela kopelo, le ka thapelo. Go boeletšoa thuto ea 45.

Go ishoa pele ka thuto ea 46, she:

### Go soanetše mang ke go tšea Selalelo se?

Dipotšisho she di:

1. Mokgoa o mobotse oa go itokishetša selalelo ke o fe? Ke go ikona didyo le go chepa mmele.

2. Go ikona didyo ka letšatši la selalelo, ke go dira byang? Ke go dya ka tekanyo.

3. Mokreste o laetša eng ka go ikona didyo?

O laetša tlala ea moea, le gobane o hlogetšoe didyo tša selalelo.

4. Go chepa mmele ke go reng?

Ke go apara dikubo tše dibotse; ka gogolo go ratoa tše diso go gopola lehu la Morena.

5. Na go itokisha ka go ikona didyo le ka go chepa mmele go tla re dira go ba ba soanetšoe go ke selalelo?

Aoa, eupya e a soanetšoe go ke sona ka makgonthe, a se loketšego ga botse, ke e a dumelago lentšu le le rego: mmele oa Morena o neoa ka baka la lena, gomme madi a gagoe a cholloa ka baka la lena, gore le le baleloe melato.

6. Modumedi ge a itokishetša selalelo, o tla reng ka dibe tša gagoe?

O tla ithsola.

7. Ke modumedi o fe e a soanetšoe go ke selalelo ka makgonthe, a loketšego sona ga botse?

Ke modumedi eo ithsolago bakeng sa dibe tša gagoe, 'mme a dumela ruri gore mmele oa Morena o neiloe ka baka la ka go le baleloa dibe, gape le madi a Yesu a cholotšoe ka baka la ka go le baleloa dibe.



8. Ba ba sa soanelego selalelo se, ba seshogo ba lokela sona, ke ba fe?

Ke ba ba sa dumelego, ba ba dikadikago ka pelong.

9. Ge motho a e loa le ngoanabo, a ka ea selalelong na?

Aoa, gobane taelo ea Morena e re: u ee pele u boelane le ngoana eno.

10. Kereke e beile tirelo e fe ea go itokishetša selalelo?

Tirelo ea boipobolo.

11. Na moruti o na le matla a go lebalela melato ea dibe?

E, gobane Morena Yesu ge a bea barutioa ba gagoe boruting, o be a re: bao le ba lesetšago dibe, ba di leseditšoe; bao le ba tiishetšago tšona, di tiishitšoe go bona.

Thuto e fetšoa ka go bea thapelo, le ka kopelo.



Ferdinand Postma-Biblioteek



010271974U

896.397718

HOF